

摘藻堂四庫全書薈要

集部

欽定四庫全書薈要

集部

御定歷代賦彙卷四十七

欽定四庫全書薈要卷一萬七千二百六十六

集部

御定歷代賦彙卷四十七

典禮

朝會賦

晉傅玄

皇之文象詠帝德乎上系考夏后之遺訓綜殷周
之典制采秦漢之舊儀肇元正之嘉會於是先期戒事
衆法允敕萬國咸享各以其職翼翼京邑巍巍紫極前
三朝之夜半庭燎晃以舒光華燈若乎火樹熾百枝之

御定歷代賦彙

皇之文象詠帝德乎上系考夏后之遺訓綜殷周

煌煌俯而察之如亢燭龍而照玄方仰而觀焉若披丹
霞而鑒九陽閭闔天門開坐太極之正殿嚴嵯峨以
崔嵬嘉廣庭之敞麗美升雲之玉階相者從容俟次而
入濟濟洋洋肅肅習習就位重列面席而立臚人齊列
賓禮九重羣后德讓海外來同東帛戔戔羔鴈邕邕獻
贄奉璋人肅其容是時天子盛服晨興坐武帳憑玉几
正南面而聽朝憑權衡乎砥矢羣司百辟進阼納觴皇
恩下降休氣上翔禮畢饗燕進止有章六樂遞奏磬管

鏗鏘淵淵鼓鐘嘒嘒笙簧搏拊琴瑟以詠先皇雅歌內
協頌聲外揚

正會賦

晉王沈

伊月正之元吉兮應三統之中靈順天地以交泰協太
族之玄精荷介祉於上帝兮祚聖皇以永貞華幄映於
飛雲兮朱幕張於前庭曜五旗於東序兮表雄虹而為
旌備六代之象舞兮釐簫韶於九成晞玄夜以司晨兮
望庭燎之高煬壯甲士之星羅兮偉干戚之飄揚臚人

肅其齊列九賓穆以成行齊八荒於蕃服兮咸稽首以
來王

南蠻北狄同日朝見賦

以渡瀘欵塞咸造闕庭為韻

唐

穆寂

我皇道叶神化功高睿算萬國之廣斯臨八聖之業是
纂遐哉辮髮之俗既竭赤誠過爾椎髻之人亦輸丹款
豈不以陰陽煥乎金鏡律呂諧乎玉琯德該動植而以
信以寬仁及飛走而不麁不卵故得殊方述職異俗來

庭歸我玄造沐我皇靈曉逾赤坂以向日夕過白登以
占星磧路誠遙委毳幕羶裘之質山梯雖險致穿胸儋
耳之形然則自南自北或馳或渡俱為九譯之鄉各涉
萬里之路同臻禁地事且叶於不期并列盛時禮若符
於有素是以坦王道恢帝圖蕩然與龍山非隔廓爾將
鳳穴靡殊集六蠻而輝赫九域萃五狄而光耀八區邇
無不賓鄙周宣勤乎薄伐遠無不服笑諸葛矜於渡瀘
遂能革至性於方外柔獷俗於面內大行人明其近遠

懷方氏導其進退靡僭晷刻既從荔浦之源固復斯須
爰自榆林之塞有以見化溢含弘恩覃覆燾膳豐館給
禮洽郊勞孰云胡越之異來若同心且殊虞芮之爭會
如兩造以其逾絕漠逗懸巖蓋由君邁軒轅顓頊臣掩
伊陟巫咸不然則焉能抵秦川來魏闕皆展遐方之貢
獻共備同日之朝謁者哉

南蠻北狄同日朝見賦

以渡瀘欵塞咸
造闕庭為韻

唐
王起

我皇制百蠻以德輝刑八狄以威靈俾曠代之絕域同
一日而來庭則不叛不侵知遐邇之無外自南自北昭
聲教之永寧惟蠻也荒陬有倔强之號惟狄也絕漠有
桀黠之暴辭炎徼應感而偕來謝穹廬不期而兩造上
乃御正殿臨中區文物有耀聲明以殊小周王之賓肅
慎卑漢后之享單于於是卉服雲集旃裘風趨駿奔而
遠無不屈磨至而實繁有徒垂衣而朝三表自慙於制
虜止戈為武五月孰矜其渡瀘百辟式瞻九儀以配寧

有截而斯暢儼無譁而相對獻琛盡禮雜彩服以和光
蹶角展容望珠旒而欣戴若非越荒徼踰紫塞則南同
魚鼈安得仰龍章於舜年北喻豺狼未可親獸舞於堯
代是知歷寒鄉之感發欽百度今無闕忘沓嶂之蘄巖
彰九區今克咸聖上惟北辰之位是繼匪南面之尊是
滿窮髮斯服雕題無算仰天威以懷柔化夷德為悃款
盛禮必具幽遐既慕同寅協恭今斯親在遠如邇兮斯
赴始差肩於著定之位終收跡於賡絕之路史臣書曰

美異俗而同臻象斯華而合趣則昔有梯山驟至航海
徑渡無蠻狄入覲之遇

朝呼韓邪賦

以煥乎威儀遐掩前古為韻

唐

闕名

倬哉惟漢至德鴻融元功絢煥敷仁義於異域俾華夷
而同貫故能臣匈奴來單于超沙漠越余吾棄窮廬而
雲起望高闕而風趨屈膝而來有以見其蠢爾垂拱以
待是用表於魏乎況當行幸祠祀之禮崇甘泉泰畤之
儀盛肅肅乎萬物是備昭昭乎威容既正象胥以鐸豈

言語以不通司儀式班示進退之必敬然後差行列辨尊卑序璧羔皮帛之等第示要荒守衛之威儀冠帶之容間彼荷氊被毳韶濩是作雜夫傑侏毘離雍容之禮有則倔强之心不施玄塞永安寧蝟起兮於彼青蒲方奏猶蟻伏而在斯信純化之雲布俾遠戎之星馳不然何以其國則賒其人不遐修臣之節為國之華朝一人於寓縣涉萬里之窮沙則周公明堂之儀寧九采之足美而夏禹塗山之會雖萬國而何嘉且夫懷我有方所

由者漸德之為被我不可掩非慕義而有求奚尊君之
自貶是知撫御之道莫善於漢宣威儀之設莫盛於甘
泉美舞徒稱乎干羽鏤勲何媿於燕然布令陳辭之義
行豈事成而後樹引領稽顙之容作乃瞻之而在前自
可光九功服九土曠萬代而一時宜耀今而榮古

周公朝諸侯於明堂賦

以九域向序外
方同心為韻

唐謝觀

赫赫明堂居國之陽魏峨特立鎮壓殊方所以施一人

所以朝萬國諸侯玉面室有三總數惟九間大廟於正
位處大室於中雷啓閉乎三十六戶羅列乎七十二牖
左个右个為季孟之交分上圓下方法天地之奇偶時
也六年之初孟春之首有截而至無脛而走將欲交正
於成王之命所以立辟於周公之手洞八闥以臨八極
闢四門而來萬有所司備班品於庭除執事肅文物於
前後及夫諸位散設三公最崇當中階而列位與羣臣
而不同諸侯東階之東西面而北上諸伯西階之西東

面而相向諸子應門之東而鶚立諸男應門之西而鶴
望戎夷金木之戶外蠻狄水火而位配九采外屏之右
以成列四塞外屏之左而遙對朱干玉戚森聳以相參
龍楊豹韜抑揚而相偕肅肅沈沈巒崇壑深煙收而卿
士齊列日出而天顏始臨戴冕旒以當軒見八紘稽顙
負斧戾而南面知萬國歸心於是鏘金石揚律呂動塤
篪搖祝敔儼若思而山立悄不言而鴈序一拜一起嶽
抃而齊傾舞之蹈之雷屯而復舉俄而翠華轉仙仗迴

恩覃率土化溢九垓合蠻貊以畢至盡梯航以爰來彼
禹有大室武作靈臺曷與此而同哉

叔孫通定朝儀賦

以制定朝儀上
尊下肅為韻

唐
白居易

稷嗣君上稽天命下察人聽以為作樂者存乎功成制
禮者本乎理定故易尚隨時禮貴從宜於以致理何莫
由斯允矣君子休哉令規採三代之帝典起兩漢之朝
儀於斯時也秦吞六雄之後漢承百王之弊禮壞樂崩

上陵下替將欲創洪業尊皇帝馴致王道丕革季世莫
先乎正位以經邦體元而立制者也夫其將用於國先
習於野辨度數於聲名文物審等威於君臣上下儒生
肅以濟濟物有其容國典煥其煌煌禮無違者然後闢
雙闕會百僚動必嚴格進無諠囂長幼之序不忒貴賤
之儀孔昭鏘鏘兮若萬國赴塗山而會秩秩兮如百官
仰太一而朝歲十月天地澄爽宮殿清曠風傳警蹕日
麗天仗於是右陳列辟左立丞相東西分而則別文武

儼以相向簪裾弈弈頌鵷鷺之具察劒戟森列熊羆
之名將帝容式展皇威克壯莫不上恭已以臨下下竭
誠而奉上觀其威儀允淑容止具篤天子負鳳扆以皇
皇正龍顏而穆穆百辟欣戴九賓悅服拔劒者懲懼而
慄慄飲酒者敬慎而肅肅故知君有威故能守其邦臣
有儀所以保其祿帝謂叔孫舊章斯存可以發揮我洪
德啟迪我後昆方將守而經國豈止煥而盈門不然何
以表一人之貴知萬乘之尊

諸侯春入貢賦

以天下侯國春入方物為韻

宋

文彥博

聖啟洪緒君臨溥天侯國之辨方有要王春之入貢昭
宣列爵正儀謹奉藩而立制建侯協序致任土以居先
稽芳載於禮經仰徽名於帝者諸侯述職以無曠太史
奉時而可假以謂惟王建國我則敘五等於域中與物
為春我則任九貢於天下徒觀夫爵分顯秩位列元侯
當是時緹管順煦和之美皇祇布發生之休震方之善
氣潛道長樂之洪儀聿脩帝容執瑁以端拱臣節奉璋

而告猷旅幣羣方咸奉舜班之瑞充庭萬品皆分禹別
之州但見雲布封疆綺分邦域故我當歲首以入用致
坤珍而罔忒巽風和令導傳臚之九賓遲日當陽麗執
玉之萬國豈不以辨九土者當貢首四序者上春蓋將
備物宜於時育助邦光之日新龜納江沱之錫磬浮泗
水之濱齒革羽毛以偕至球琳琅玕而畢陳三品良金
於以向履端而執贄五都奇貨於以當獻歲而效珍莫
不名物森羅衣纓雜襲雖厚篚以斯備在庶邦而允集

此春也需於皇澤當鄒律之均溫彼貢也錯於地財異
楚茅之不入彼來宗者夏之禮制獻功者秋之典章曷
若謹歲貢以備物慶春祺之載陽諒脩時而貢職乃辨
物以居方備於蕃於宣之儀皇皇輯瑞當載生載育之
候濟濟來王故聖人灼敘聲明光昭文物懿公侯之隆
盛充貢賦之繁蔚屬后王布和之辰獻國珍而罔哂

王會圖賦有序

元李廉

唐貞觀三年天下太平四夷之國莫不臣服各率其部

蟬聯來降會同京師於是中書侍郎顏師古請如周史
臣集四夷朝事為王會編寫圖以示後作王會圖乃命
閻立本圖之以形容萬國朝貢之象彰有唐教化之效
晉陽起兮揮天戈滌隋氛兮挽銀河儼皇居兮突兀俯
六合兮誰何森乎如一軸當中而羣輻俱湊煥乎如北
辰居極而環宿共羅方其大明閭闔開闢魚金鱗次筍
玉鴈立極衣冠兮中州率侏離兮異域扶桑崦嵫濮鈞
祝栗渺八紘兮萬里重象胥兮幾譯而乃貢琛獻贄俯

伏主臣前追後隨穆穆彬彬環佩瑤兮拂朝露旌旗舞
兮旭海暎絳紗啟兮玉斧明雉尾疊兮翠葉繽玉宇泓
澄天顏肅穆偉盛德之形容恍丹青兮一幅海色天光
洞射輝映瑰奇譎詭萬怪千勝恍兮九鼎並列而戢戢
乎方物燦兮輿圖初開而混混乎遠近也彼其金齒斷
鰐環耳玲瓏迤邐而階進者非交趾夜郎之遺賔乎翠
髮鬟茸綠睛轉紅俯偃而欲前者非鐵勒頗超之裔戎
乎雅髻生風左衽並臂此吐蕃之長部西極而並至者

邪裘氎點雪帽茸飛霜此靺鞨之首領北國而入衛者
邪或駕象兮侏儒或蒙璆兮遽蔭或織皮兮崑崙或卉
服兮東隅或額金兮項環或足貝兮膺珠或披赤罽或
負氍毹或劒兮吳鉤或刀兮鋌鋌南冠越喙駢頭接足
齊儂楚傖氣屏容肅莫不盱眙傾盼愴怵蹢躅慙五方
之異形慕中州之清淑趨多士之濟濟偉文物之郁郁
也粵茲圖之孰創兮實遠慕兮周室俯聖治之何如今
偉姬旦之美績天風無迅海波不揚楫矢來兮肅慎白

雉獻兮越裳宜顏師古之彷彿而經營閭立本之所以
盤礴而彷徨也然予嘗考貞觀之初饑蝗未息頡利未
驅文皇方力於教化廷臣方贊於都俞夫何師古以六
經之學乃區區於一圖侈王會以蕩君心孰若明王道
以贊廣謨且夫明堂之位乃漢儒傳會而王會之編安
知非史氏之諛況乎重譯之至周公方為之退遜旅獒
之來太保重為之戒謹則夫史佚周任之儔亦豈為是
以獻其愚也嗚呼十漸將形於諫疏而王會遽眩於心

目此太宗王業所以不純而他日高麗小醜致天下於
骨暴未必非師古啓之安得不視魏公而心忸也方今
重熙累洽握符闡珍以大一統之規模極大九州之經
綸際天所覆極地之蟠雖塗山之會不足以擬盛合宮
之朝不足以等倫居今日者固當為宋廣平為真西山
使無逸豳風之美再見猶欲黼黻師古之餘智而想像
立本之毫端也

王會圖賦

元
龔璿

日域月窟鯨海龍沙車書萬里胡越一家撫泰運於方
今懷盛觀於往古後蒼姬之千載隆有唐之丕祚炳記
載於汗青爛形容乎紺素豈徒侈功烈之鋪張實以聳
華夷之向慕也若稽武王天命伐殷垂衣裳以致治壹
遐邇而來賓旅葵桡矢之入貢九夷八蠻之效珍史特
書於編錄式昭示於後人此其開有周八百年之業而
實非後世之所擬倫降秦而漢歷晉及隋唐承天命奄
奠中都拯生民於塗炭又宇宙之一初由是西踰岑徼

東越海瀕北窮幽朔南極朱垠咸梯山而航海亟奉貢
而稱臣惟此文皇曰英且明既克戡於大難救寧相貞
觀之效速乃三年而有成維彼諸蠻越在南荒方萬國
之賓服乃率先以來王觀其服裝異制形貌殊質冠蒙
茸之玄熊重咿喞而九譯褫氍毹於遐邦襲衣冠於中
國於是明堂大開列辟雲趨戎夷旅國門之列蠻貊環
庭闕之隅端九重之臨御賓萬國而受圖日照月臨近
清光於咫尺天覆地載扇皇風於八區四方既同天子

之功微臣師古敢瀆淵聰昔在有周四夷畢朝史臣有
請編簡名標肆而篇以王會閱千載於一朝矧今盛時
度越當年幸目覩於盛事可湮鬱而弗宣願為圖以示
後與周書而並傳帝顧曰嗟嗟我匪德奚遠人之慕義
乃相率而來服豈予心之克當實股肱之盡力微臣曰
都盛德致昌皇威遠浹乃抑弗當信謙讓之允極寧子
孫之可忘帝曰俞哉立本汝來維周篇之王會歷秦火
而未灰越蓋臣之有請宜肖像之畢該汝丹青而作繪

增賁飾之昭回立本曰都臣拜稽首雖無造化之筆敢竭對揚之手願摹擬於萬分庶永詒於厥後於是詔內臣出縑楮錫丹鉛於尚方分筆墨於御府俾肖像以惟真俾周篇而作輔迨夫心精目巧意定神閒能事非迫促之須妙思較錙銖之間肆其萬醜殊形羣蠻異類赤髮鬖鬖而拳毛目深睽眦而猥喙匪服羽而衣皮斯雕題而交趾窮詭異之百端肖妍媸於一揆不知圓形於毫素之間蓋已逼真於明堂之位矣訖乃敷奏允愜上

心動天顏之喜色催一笑而賜金俾登之於秘府用垂
示於來今愚嘗稽往事於三代建誼辟於太宗甫干戈
之未息聿文館之是崇美瀛洲之圖像暢四海之儒風
逮貞觀之王會亦一時之豐功何師古儒臣徒切比於
周文而旅獒作訓曾不師乎召公不知教化之效何如
仁心之既効使俯伏之含毫吮墨寧不愧傳呼於畫工
是朝貢有象適以驕好大喜功之志而魏徵之思寧不
詒後悔於遼東故讀史至此而每為之三嘆而況圖昔

時之無逸為後來之山水者又焉保其初終惟我皇元
列聖相承奄開闢以來未有之天下軼唐虞而上極盛
之文明萬國來王圖不能以盡其意會其有極民不得
而為之名愚生何幸而觀光於上國賦方今之朝會以
黼黻邦家之太平

司空掌輿地圖賦

以平土之職圖
掌輿地為韻

宋

歐陽脩

率土雖廣披圖可明命乃司空之職掌夫輿地之名奉

水土以勤修慎司無曠覽山川而盡載按牒惟精所以
專一官而克謹辨九區而底平者也伊昔令王尊臨下
土以謂縣宇非一不可以周覽衆職異守俾從於各主
故我因地理之察宜建冬官而法古將使如指諸掌括
乎地以無遺皆聚此書著之圖而可覩險固咸在方隅
異宜分形勝以昭若庶指陳而辨之度地居民既脩官
而有舊辨方正位俾披文而可知其或作屏建親命侯
封國小大有民社之制遠邇異封圻之式非圖無以辨

乎數非官無以奉其職主於空土既險阻之盡明別爾
分疆誌廣輪而可識誠由據函夏之至要贊大君之永
圖上以體國而經野下以建邦而設都參古號於周官
各司其局辨羣方於禹跡無得而踰是何標區域以並
分限華夷而靡爽域中所以張乎大天下無以逾其廣
亦猶五土異物必辨於司徒之官九州有宜乃命乎職
方之掌用能三壤咸則四民奠居窮人跡於遐域包坤
載於方輿且異夫充國論兵但模方畧之狀鄩侯創業

惟收圖籍之餘彼夏貢紀乎州名漢史標乎地志雖前
策之並載在設官而未備曷若我謹三公於漢儀專掌
圖於輿地

至日早朝賦

明 劉 球

維宣德紀元之五載逮玄冥司令之中旬羲和回馭於
北陸招搖指子於初昏玉琯之灰乃動黃鍾之候維新
開萬物之太始轉一氣於鴻鈞幸遇昇平之會於今日
宜致履長之慶於紫宸焉故時則靈臺是定禮則鴻臚

是宰儀物則內外畢備執事則大小恪戒莫不齊沐宵
興敬恭以待是日也及東方之未曙仰明星之猶光車
塵紛紜以起途燭影燦爛以交張聽玉漏之滴瀝望廷
燎之輝煌九門闢兮既廓三鼓發而有鏜填兩掖以競
進鳴雙珮兮鏗鏘陞衛羅以萬隊鹵簿設其兩傍合之
則為耦離之則成行牙旗羽蓋龍文鳳章玉節金螯及
矛戈揚衆不能名美不能方少焉日曈曨兮東躋雲縹
緲兮下幕浮佳氣於簾櫳燦祥光於碧落飛鳥隼兮垂

翔凝冰霜兮融液爐煙起而香風飄
闔象端厥容止仗馬不敢喘息然後啟瑤局來警蹕鴻
鐘鐃鑾輿出高明袞衣之日月遠覩天位之飛龍黼宸
後設而斷必自乎睿思冕旒前隨而明不掩於重瞳無
動聲色篤恭其容儼然帝舜之正位乎南面何異周武
之垂拱乎九重其臣則王公侯伯貂蟬炫幘玉帶懸牙
朱衣襲裼卿大夫士降至百職濟濟蹒蹒莫不盛飾冠
以品分班以次設東文西武鴛排鵠植旁及服左衽之

遠夷言侏僂之羣貊詩書所未道其名唐虞所不賓之
國皆奉玉帛而遠來亦幸觀光乎其側於是絳幘雞人
長鳴東廡伶官發音金石祝敎琴瑟簫管交宣迭鼓聲
洋洋乎盈耳節鏗鏗乎有序禮官唱讚登降拜俯進退
啟跪或躍或舞咸中乎儀罔愆於素諸方匭進之辭既
退萬口蒿呼之聲齊舉喜動乎天顏聲振乎寰宇迨乎
大禮既成祥慶薦臻荷天子之有命賜衆臣休暇於浹
辰宴幣既頒恩禮復勤凡有生之衆庶莫不願戴於一

人且夫冬之為節自古所尚豈但魯史備雲物之書周
官重圜丘之享蓋其在易卦則為復而復之為義取乎
陰消而陽長陽長則君子道泰之漸陰消則小人道否
之象上必體此而思君子之道當崇下必體此而思小
人之道不足仗上下同情是則是懲務使邪枉不得勝
乎正直讒慝不得妨乎賢能則天下可納之仁義之域
功德可齊乎唐虞之稱皇圖於焉而鞏固福物自是而
駢增

甘泉賦

有序

漢揚雄

孝成帝時客有薦雄文似相如者上方郊祀甘泉泰時
汾陰后土以求繼嗣召雄待詔承明之庭正月從上甘
泉還奏甘泉賦以風其辭曰

惟漢十世將郊上玄定泰時擁神休尊明號同符三皇
錄功五帝卹胤錫羨拓迹開統於是乃命羣僚歷吉日
協靈辰星陳而天行詔招搖與太陰兮伏鉤陳使當兵
屬堪輿以壁壘兮捎夔魑而扶獠狂八神奔而警蹕兮

振殷鑠而軍裝蚩尤之倫帶干將而秉玉戚兮飛蒙茸
而走陸梁齊總總以搏搏其相膠轕兮焱駭雲迅奮以
方攘駢羅列布鱗以雜沓兮倏倏參差魚頡而鳥眈翕
赫矍霍霧集而蒙合兮半散照爛燦以成章於是乘輿
迺登夫鳳皇兮而翳華芝駟蒼螭兮六素虬螭略蕤綏
離虩繆纚帥爾陰閉霅然陽開騰清霄而軼浮景兮夫
何旗旐邳偁之旖旎也流星旄以電燭兮咸翠蓋而鸞
旗屯萬騎於中營兮方玉車之千乘聲駢隱以陸離兮

輕先疾雷而馭遺風凌高衍之崿嶷兮超紆譎之清澄
登椽欒而朏天門兮馳閭闔而入凌兢是時未臻夫甘
泉也迺望通天之繹繹下陰潛以慘慄兮上洪紛而相
錯直嶢嶢以造天兮厥高慶而不可乎彌度平原唐其
壇漫兮列新萸於林薄攢并閭與茆藉兮紛披麗其亡
鄂崇丘陵之駸駸兮深溝欽巖而為谷達達離宮般以
相燭兮封巒石關施靡乎連屬於是大厦雲譎波詭摧
唯而成觀仰矯首以高視兮目冥眴而無見正瀏濫以

弘惝兮指東西之漫漫徒徊徊以徨徨兮魂眇眇而昏
亂據軫軒而周流兮忽塊北而無垠翠玉樹之青蔥兮
壁馬犀之璘璠金人仡仡其承鐘虞兮嵌巖巖其龍鱗
揚光曜之燎燭兮垂景炎之忻忻配帝居之縣圃兮象
太一之威神洪臺崛其獨出兮檄北極之嶸嶸列宿迺
施於上榮兮日月纔經於枅振雷鬱律於巖窅兮電倏
忽於牆藩鬼魅不能自逮兮半長途而下顛歷倒景而
絕飛梁兮浮蟻蠓而撇天左櫬槍而右玄冥兮前燦闕

而後應門蔭西海與幽都兮涌醴汨以生川蛟龍連蜷
於東厓兮白虎敦圉乎崑崙覽樛流於高光兮溶彷徨
於西青前殿崔巍兮和氏玲瓏抗浮柱之飛棟兮神莫
莫而扶傾閼閼其寥廓兮似紫宮之崢嶸駢交錯而
曼衍兮崦嵫隗乎其相嬰乘雲閣而上下兮紛蒙籠以
混成曳紅采之流離兮颺翠氣之宛延襲璇室與傾宮
兮若登高眇遠亡國肅乎臨淵迴焱肆其碣駭兮披桂
椒而鬱移楊香芬第以穹窿兮擊薄櫨而將榮薌咲矜

以棍批兮聲駢隱而歷鐘排玉戶而颺金鋪兮發蘭蕙
與芎翦帷弮深其拂汨兮稍暗暗而靚深陰陽清濁穆
羽相和兮若夔牙之調琴般倭棄其剗剗兮王爾投其
鉤繩雖方征僑與倭佺兮猶髣髴其若夢於是事變物
化目駭耳回蓋天子穆然珍臺間館璇題玉英螭蝓蝓
濩之中惟夫所以澄心清魂儲精垂恩感動天地逆釐
三神者迺搜述索偶臯伊之徒冠倫魁能函甘棠之惠
挾東征之意相與齊乎陽靈之宮靡薜荔而為席兮折

瓊枝以為芳喻清雲之流霞兮飲若木之露英集乎禮
神之園登乎頌祇之堂建光耀之長旂兮昭華覆之威
威攀璇璣而下視兮行遊目乎三危陳衆車於東阡兮
肆玉軼而下馳漂龍淵而還九垓兮窺地底而上迴風
淙淙而扶轄兮鸞鳳紛其銜蕤梁弱水之湍濊兮躡不
周之逶迤想西王母欣然而上壽兮屏玉女而卻宓妃
玉女亡所眺其清矚兮宓妃曾不得施其蛾眉方攬道
德之精剛兮侔神明與之為資於是欽柴宗祈燎薰皇

天招搖太一舉洪頤樹靈旗樵蒸焜上配藜四施東爚
滄海西耀流沙北燠幽都南煬丹厓玄璣觥醪秬鬯泔
淡盱蠶豐融懿懿芬芬焱感黃龍兮慄訛碩麟選巫咸
兮叫帝閭開天庭兮延羣神儼暗藹兮降清壇瑞穰穰
兮委如山於是事畢功弘迴車而歸度三巒兮偁棠梨
天閼決兮地垠開八荒協兮萬國諧登長平兮雷鼓磔
天聲起兮勇士厲雲飛揚兮雨滂沛于胥德兮麗萬世
亂曰崇崇園丘隆隱天兮登降剡施單墀垣兮增宮參

差駢嵯峨兮嶺嶢嶢峴洞無厓兮上天之綽杳旭卉兮
聖皇穆穆信厥對兮徠祗郊裡神所依兮徘徊招搖靈
棲遲兮輝光眩耀降厥福兮子子孫孫長無極兮

南郊賦

晉郭璞

於是時惟青陽日在方旭我后將受命靈壇乃改步而
鳴玉升金軒撫太僕揚六轡齊八駟列五幡於一元兮
靡日月乎黃屋矯陵烏以偵候兮整豹尾於後屬武騎
仡以清道被練煥以波燭爾乃造曠場戾壇庭百寮山

立萬乘雲縈延祝史肆玉牲登園丘揖太清禮羣望告
皇靈天澄其氣日朗其精飛廉鼓舞於八維兮豐隆擊
節於九冥祝融穆以肅侍兮陽侯澹以中停於是司烜
戒燧火烈具炳宗皇祖而配祀增孝思之維永郊禋之
內區域之外雕題卉服被髮左帶駿奔在壇不期而會
峨峨羣辟蚩蚩黎庶翹懷聖猷思我王度事崇其簡服
尚其素化無不融萬物自鼓振西北之絕維隆東南之
撓柱廓清紫衢電掃神宇風馬桂林抗旌琳圃五岳不

足以顯其勲九韶不足以贊其舞饗駭鬼方聲振丘隴
倒景望風龍漢企踵爛若列星之環辰咸雲騰而海湧
此蓋和氣旁通玄羅潛總自然之感鼓而遂動

郊祀賦

陳
鄧 耽

咨改元正誕章厥新豐恩羨溢含唐孕殷承皇極稽天
文舒優遊展弘仁陽明光宥臯人羣公卿尹侯伯武臣
文林華省奉贄厥珍夷髦盧巴來貢來賓玉璧既萃於
斯萬年穆穆皇皇克明厥德應符蹈運旅章厥福昭假

列祖以孝以仁自天降康保定我民

南郊賦

唐
徐彥伯

維帝唐八十有五載鴻徽鑠於縣寓騰陽精握機矩還
攝提以產氣配神明而作主倬四后之在天伊萬物之
胥覩左日磬右星圃吹烈火於炎丘覲堅冰於委羽莫
不匍匐我聲教駿奔我珪組納大荒之管鑰伏堪輿之
扃戶茲可以孩黔羸扶盤古苞混茫而首出亦奚云於
三五哉於穆我皇纂戎而昌青氣搖社白雲入房與天

地合契與日月齊光杖太一毆羣剛共工戮兮河嶽正
旬始滅兮星辰張輯稽古之禮物懸象外之舊章雖配
天復禹繼嗣興湯者不其懋歟肇允神聖浸發葆命芬
德馨香崇庸祇敬吟蓼蕭以游渥合臬桑而蘊正關石
龢鈞飛沈翔泳擇明居之全法撰蒼渠之闕令則太階
平而玉衡正也庶績洪凝賡歌浩作陰隲於下有孚顒
若恢負勝之圖賁昭功之篇是以玄龜遊乎湍瀨丹鳥
吟於觀閣芝房菌蠢而玉英景雲璀璨而金萼雙葩共

抵之獸躑躅苑山一稔二米之穎紛拏畎壑邦誦中和

咄歌小毖歲合作噩日交長至邁朔旦之明期擇純陽
之正地欲陳大旅展時事告紫宙之成功定皇天之寶
位蜃驚司典鳴鳩歲職崇泰壇考星翼畫八卦以通道
錯五行而辨域對越精祗森羅正直木巽火而殷薦豫
乘雷以罔極載師清野土訓掃廛繚垣虹合參途電聯
籠組帷以艾景覆皇邸以慶煙宮伯糾其禁內饗烹其
鱻周廬攢構以戢晉列燾抗莖而翩縣繩繩都人濟濟

多士九牧之守百蠻之子莫不挈鴈提羔攢驂噓軌紛
鴻溶以騰逗叛適皇而佑儼或駢肩而側足候吾君之
戾止若葵藿之傾離光同江河之赴溟水也然後啟端
門警仙蹕雙鳳矯首六龍齊膝青旒胥雲紅旌彗日鏘
玉鸞之鳴輶按金雞之廣術傳畫角以啾嘈曳朱旗以
駢坐呵風伯令戒道制玄冥使司律此靈祇所以保綏
皇天所以宥密於是闢龍次幸蜺幃鶉鳥司襄熊羆奉
收皇帝乃彰畫黻襲大裘端玉珽肅珠旒翼翼穆穆遂

臻於園丘躬孝享擁神休設天宗之六席援長發之二
球盥以明水薦以香羞陳蒼璧而咸事藉白茅而闡幽
絜騂旄之泔淡酌玄瓚之醑醪盛哉坤極順天而見邸
乳祥開曾沙業薦赫禮數於彤壺布徽音於紫縣率先
於金簿之蠶謹覆以瑤筐之驚皇后介禮恭茲亞奠凝
億兆之歡心注穹蒼之景盼紫微開兮天香滿神之來
兮軒星纂候黃鍾兮雪飛調大呂兮風煖夏雲和之寶
瑟吟孤竹之清管石麟天矯團翠煙而上征麇鳳沕霍

迂鴻釐之無算瑞氣蜿蜒於數旬祥光熠爚於旄罕三
觴終獻萬祗呈醺昇羽節導靈羣凝肆夏以青畧颺登
歌而咽雲徽鸞鷟之颯沓致戩穀之綢繡禮畢功成天
旋日轉宸儀允穆后庸胥展引大火之流旂迴夷庚之
翠輦倪三蠻之崇構御六氣之遙辨覽太玄之神策張
集靈之瑞典草木亨兮雷雨霽霈湛恩灑兮雲霄霑霽
壽觴霞舉兮絲竹龢筐筐岳立兮駢差峨天子方合符
於大庭之國錯事以梁父之阿岱崩嶷兮清嶂汶泓澄

兮紫波屯千轂以霆轉整萬轡而星羅則述易象者獻
風行之繇談比興者奏時邁之歌蕩蕩乎巍巍乎無得
而名言矣遂作頌曰煌煌靈臺告成功兮我君孝享亞
坤宮兮純嘏布濩延皇穹兮惟策代表靄升中兮享壽
千億傳無窮兮

有事於南郊賦

唐
杜甫

蓋主上兆於南郊聿懷多福者舊矣今茲練時日就陽
位之美又所以厚祖考通神明而已職在宗伯首崇禋

祀先是春官脩頌祇之書獻祭天之紀令泰龜而不昧
俟萬事之將履掌次閱氊邸之則封人考壝宮之旨司
門轉致乎牲牢之繫小胥專達乎懸位之使二之日朝
廟之禮既畢天子蒼然視於無形澹然若有所聽又齊
心於宿設將盥食而匪寧旌門坡陀以前驚駭騎反覆
以相經頡曾城之軋軋軼萬方之熒熒馳道端而如砥
浴日上而如萍掣翠旒於華蓋之角彗黃屋於鈎陳之
星神仙戍削以落羽魑魅幽憂於固扃戰岐慄華擺渭

掉涇地回回而風淅淅天泱泱而氣青青甲冑乘陵轉
迅雷於荆門巫峽玉帛清迴霽夕雨於瀟湘洞庭於是
乘輿霈然乃作翳夫鸞鳳將至以冲融寥廓不可乎彌
度聲明通於純粹溟滓為之垠堦駟蒼螭而蜿蜒若無
骨以柔順奔鳥獲之黜鰲徒有勢於殺縛朱輪竟野而
杳冥金鏃成陰以結絡吹堪輿以軒輕槍寒暑以前却
中營密擁乎太陽宸眷眇臨乎長薄熊羆弭耳以相舐
虎豹高跳以虛攫上方將降帷宮之絺綌屏玉軼以蠟

略人門行馬以拱乎合沓之場皮弁大裘始進於穹崇
之幕衝牙鏗鏘以將集周衛轆轤而咸若月窟黑而扶
桑寒田燭稠而曉河落肅定位以告潔藹嚴上而清超
雲芻菹以張蓋春歲蕤以建杓簪裾斐斐樽俎蕭蕭方
面曲折周旋寂寥必本於天王宮與夜明相射動而之
地山林與川谷俱標於是乎官有御事有職所以敬鬼
神所以勤稼穡所以報本返始所以度長立極玄酒明
水之上越席疏布之側必取先於稻秫麴蘖之勤必取

著於紛純紋繡之飾雖三牲八簋豐備以相沿而蒼璧
黃琮寶歸乎正色先王之丕業繼起信可以永其昭配
羣望之徧祭在斯示有以明其翼戴由是播其聲音陳
乎節奏以進退韶夏獲武采之於訓謨鍾石陶匏具之
於梗概變方形於動植聽宮徵於砰礚英華發外非因
乎筍簾之高和順積中不在乎雷鼓之大既而鸞鶯胥
習柴燎窟塊騶駉擘赫葩斜晦漬電纏風升雪颯星碎
拂勿佺澹渺溟蓀粹聖慮岑寂玄黃增霈蒼生顒昂毛

髮清籟雷公河伯咸駢駢以脩聳霜女江妃乍紛綸而
晻曖執紱秉翟朱干玉戚鼓瑟吹笙金支翠旌神光倏
斂祀事虛明於是潏灑乎渙汗紆餘乎經營浸朱崖而
灑朔漠洶暘谷而濡若英耆艾涕而童子舞叢棘拆而
狴犴傾是率土之濱覃醑醕以涵泳豈奉郊之縣獨宴
慰以縱橫玄澤淡泞乎無極殷薦綢繆乎至精稽古之
時屢應符而合契聖人有作不逆寡而雄成爾乃孤卿
侯伯羣儒三老儼而絕皮軒趨帳殿稽首曰臣聞燧人

氏已往法度難知文質未變太昊氏繼天而王根啟閉
於厥初以木傳子攄終始而可見洎虞夏殷周茲煥炳
而蔥蒨秦失之於狼貪蠶食漢綴之以蛇斷龍戰中莽
茫夫何以從聖蓄縮曾不下眷伏惟道祖視生靈之磔
裂醜害馬之蹄齧呵五精之息肩考正氣之無轍協夫
貽孫以降使之造命更挈累聖昭洗中祚觸蹶氣慘黷
乎脂夜之妖勢迴薄乎龍蛇之孽伏惟陛下勃然憤激
之際天關不敢旅拒鬼神以之嗚咽高衡騰塵長劒吼

血尊卑配字縣刷插紫極之將頽拾清芬於已闕鑪之以仁義鍛之以賢哲聯祖宗之耿光卷夷狄之影撇蓋九五之後人人自以遭唐虞四十年來家家自以為稷禹王綱近古而不軌天聽貞觀以高揭蠹爾差僭粲然優劣宜其課密於空積忽微刊定於興廢繼絕而後覩數統從首八音六律而惟新日起算外一字千金而不減上曰吁昊天有成命惟五聖以受我其夙夜匪遑寔用素樸以守于嗟乎麟鳳胡為乎郊數乃上帝之降鑒

及茲玄元之垂裕乎後夫聖以百年為鵲驚道以萬物
為芻狗今何以茫茫臨乎八極眇眇託乎羣后端策拂
龜於周漢之餘緩步濶視於魏晉之首斯上古成法蓋
其人已朽不足道也於是天子默然而徐思終將固之
又固之意不在抑殊方之貢亦不必廣無用之祠金馬
碧雞非理人之術珊瑚翡翠此一物何疑奉郊廟以為
寶增怵惕而孜孜況大庭氏之時六龍飛御而歸

至日圓丘祀昊天上帝賦

以題為韻

唐

蕭穎士

政教之始莫重乎郊祀郊祀之先莫尊乎昊天是以前
王垂之於典訓後帝奉之以周旋以事大矣其儀盛焉
日之至也所以明氣之至丘之圓也亦以象天之圓於
是致齋於宮合樂於律羣有司肅肅以儆戒百執事乾
乾而莊慄牲用騂犢以貴誠酌用玄酒以明質豈但愛
人而尊祖蓋欲報天而主日天子迺乘玉輅駕蒼虬搢
方珽服大裘率九儀之卿士從五等之諸侯旌旗露卷
冠蓋雲浮展國容於御路行大禮乎郊丘百役既備司

儀辨位劍佩紛紜以陸離鐘鼓鏗訇而沸渭君明其義
臣敬其事執鸞刀以啟毛奠蒼璧以為贄爵一獻而上
下胥悅樂六成而神祇麇至後乃取血脣陳玉幣寘於
積薪之上燔於嘉壇之際飛燎煙於太清合蕭光於上
帝是以神降我福人懷我惠時罔凶荒物無疵癘致洪
化於仁壽豈不由肅敬於大祭客有旅遊函關欽茲至
道觀祀事於國典仰明靈於有昊敢陳輿頌式播玄造
頌曰日南至兮既望祀太一兮圓丘上萬斯年兮承天

貺

至日圓丘祀昊天上帝賦

以題為韻

唐

賈餗

惟天為大惟聖奉天所以就陽位郊上玄禮高明之覆
育答生植之陶甄告太一以祇敬擁神休而吉蠲於是
採遺範於周故封土以成丘取法於乾故象形以應圓
顧椒糝之莫達憑柴燎以斯傳是時星昏東壁日躔南
至爰命有司肅將祀事羅幄帟以雲黼駢壘俎以鱗次
藉白茅兮取諸潔薦蒼璧兮象其類皇威允穆司儀辨

等而以班明德惟馨祝史陳辭而不愧於是啟禁扃警
仙蹕千官拱立六龍齊膝濟濟鏘鏘匪徐匪疾奉常告
備乘輿乃出覆玉葉之卿雲昭扶桑之初日齋心滌慮
所以感無不通樂徧禮成故能神降之吉觀夫廣場還
合泰壇五時告萬物之生成當一陽之初晷揖羣望以
咸秩列衆靈以備祀紫微開兮天意通元氣調兮薰風
起祀之大者莫盛茲道展敬乎皇心報功乎玄造奏搏
拊之清樂徹純殷之蒼昊實祀典之所崇諒邦家之攸

保若乃陳以牲幣酌以秬鬯歌大呂以為節舞雲門以
為狀達誠於氤氲之際降靈於閭闔之上騰瑞氣而宛
延燭神光兮溥暢我國家報本克禋順時脩祭配太祖
於座於以敬宗祀皇天於郊為能饗帝此所以神祇降
鑒天人合契保昌運兮永貞崇明祀兮不替

大報天賦

宋范鎮

大宋七十有二載符節合於聖神陶鈞運於真宰化至
而乾用九令行而風不再泰山四維兮固基圖而靜寧

黃河一清兮撫期運而茂對元尊降休其如響富媪效
珍而弗愛星氣交見景炎青赤之光魚馬兩至道出東
西之海於時百靈會鈞天之遊萬物極崇丘之大鑿井
者罔識帝力仰盆者不知天蓋以上方游神治古之表
垂意幾成之會道皇極以甚夷基太平而無外重茲盈
成罔或遑怠若曰時靡愆伏物不疵癘協氣洪塗而融
然無際者上穹之保艾邊鄙不聳干戈倒載生靈相與
而歡然於內者三后之大賚按物理以順考會朕躬之

弗逮不有反本之報曷為含生之賴況夫事具往聖之
行文備前世之載媯庭有六宗之禋周家有始祖之配
書以巡嶽而用事禮以埽地而展采總條貫於先猷赫
聲文乎當代上一其唱下百其響伯夷秩宗之典叔孫
奉常之掌咸謹職以先次率參謀而來上僉曰用日之
至吾道之長就國之南吾君之嚮可以為人而祈福示
聖人之能饗也涓辰之良既如是講儀之盛又如彼將
命以方底飛文以疾置鼓先令於民聽俾咸知於上意

西踰月毳之垠東走天池之紀北窮祝栗之野南極濮
鉛之地雷出而奮豫風興而披靡穹居卉服華體木薦
之酋髻首貫胸離身反踵之帥尋聲望景知中國之有
至仁梯虛航深示戎狄之無外事順走我轍跡服馴我
鞭轡迺有雙貉共抵之獸赤汗赭沫之駟浮琛沒羽之
珍文鉞碧砮之異諸福之物倜儻奇偉衆變之狀燦爛
譎詭按圖謀而未書歷封禪而不至滔滔焉峨峨焉來
助祭者波委而嶽峙吾皇遊巖廊搯絕瑞嘉聞聲教之

遠樂觀儀物之備迺飭四方近逮周行搜傑索俊提忠
挈良相與齊於壇蜎蠖獲之中思所并而周流常羊者
已在出警之先期也闕觚削其如倚鋪首呀而欲驤行
幄默而下垂樂宮岼其高張八校拱著五旗司方禮器
之歲黻軍裝之陸梁錯文以章藻采兮四會五達之莊
既法從之盼飾倏呼鞭之對揚神扶絳宸乾行東廂左
黃鍾兮五音以俱動前式道兮三候而相望始乘輿也
顒顒昂昂奮至德之光大明登兮重昏破而羣陰藏既

遵途也秋秋蹌蹌走萬人之望駭颺馳兮浮埃沈而瑞
氣翔參忠信於倚衡兮遠何適而不臧總德法而示防
嶽然其不動兮躬自厚而矜莊春然其太和兮躬不違
而滋涼顓儲思於逆釐之事也徑息駕乎列仙之場儼
陟降以肅潔兮香悟靈於惚恍款謁之辭稱畢孝思之
容外溢葦然如傷沛然不懌念報天之罔極顧履霜而
懷惕莫重乎禮經之五以觀乎世廟之七內則樂穆羽
舞旄狄薦苾芬儀赫奕遲奉乎明靈之來格外則熊司

旗虎視戟威振厲氣勃鬱肅陳乎游徼之駢坐俄而傳
呼旦之聲嚴出廟之蹕盼重闔以南直屆夫禮神之室
觀夫涂大朱以洞闢壇八觚而翼騫珮紳綏之綵繅穎
貂蟬之蔥芊上摩星以旃雲下藻野而縟川聖人凝旒
以則數薦璧而象圓樂六變而導和爵三獻而告虔百
神愛瑞以祖洽四方承宇而來旋啟腓肱之芬膏焜樵
蒸於高煙沓馨明之升聞藹嘉休而肅延迴五輅兮清
道御兩觀於中天歌塗巷而沸湧觀堵牆而駢填或陰

而霞紛振衣而瞥袂方冬而暑盛疊跡而側肩靚妝千
車迴轅衝朝岌若移山之行隱如奔雷之聲磕砰礧礧
以拱乎神庭鐵衣萬騎奮踞橫逸晶如積雪之釋迅如
衝風之疾宛轉絡繹以環於帝室嚴辨兮中外臚句兮
上下繩鶴馭以飛書絙雞竿而肆赦縱係縲以畢出普
疵吝而一灑重離之曜大繼明以照四方泰山之雲不
崇朝而徧天下飭飫賜沐純嘏受釐而延膝席飲福而
奏需雅太室之聲曼延於壽歷覆盂之安盤固於宗社

彼甘泉汾陰后土之祠交門竹宮神光之拜或孜孜於
曲請或屑屑於末戒隘哉陋乎曾未知福含生懷萬靈
之為大也有一二省壽顧謂臣曰子游都而盛其際吉
其逢者所謂觀國之光利用賓於王矣亦嘗知盛際之
所自出吉逢之所由來者乎子少留吾其語汝夫聖人
之將有為也必本於仁義聲而為樂文而為禮柄而刑
賞統而祠祭崇讓以樹之懷遠以固之作德以茂之此
古先之能事教化之肇基也故其始下詔則有司指南

有經叩天進辭相與上乎榮號者當宁却而不名斯崇
讓之至誠也將俱儀則百蠻款塞移珍謁謹象譯厥角
於北闕者本朝羈而不絕斯懷柔之上烈也既已事縣
官去煩削密輕徭緩租驅躋於仁壽者庶黎愉然而
宥斯作德之洪覆也夫一舉而關衆目非由聖躬發憤
其孰能大圖而殫究子盍亦按胥庭之圖披義農之籙
援結繩造契之具跡卷領垂衣之躅料基緒之馮厚準
元精之回復揚波以挹其腴潤槁芳以塞其稠縟然後

攄文心散辭氣伏天庭而進牘臣蹶然而仰曰富哉言
乎微丈人後進生其不識王澤之滲漉也謹拜手而系
曰赫赫鉅宋體元垂統升中而奉兮恢恢大圓應聖何
言隕社以蕃兮吾皇之隆彼蒼之崇合符無窮兮

圓丘賦

宋 宋 祁

若夫天地之區既奧而腴王者所以作京焉神明之隩
匪攻而築上帝所以定位焉我朝之擁歸運也譏函鎬
保界之陋鄙周維淳潛之淵乃據梁之芒芒傾河之渾

渾畫邦畿之千里於以宅天子之尊然後翼翼乾乾作
邦孚先禘其祖之所自出兮遂有事乎昊天占國南之
七里得高丘之崛然自乾寓之初闢保坤靈而不遷藏
偉兆於遐葉震元符於茲年此烈祖所以哀神之對神
宗所以放物之蠲真考之所陟降丕后之所周旋藹列
聖以烝衍總萬靈而賓延翕降監之厚福焯巍巍而亡
原則晉考卜乎委粟漢盱飾乎甘泉曾不得望我之末
光絕炎況並驅而齊肩哉敢問圓丘之狀也其何如矣

廣矣大矣略可詳矣上崔嵬以鬱律兮外博敞而神麗
遡朱鳥以高蟠兮檠瑰魁而邪峙休氣回復乎其椒兮
榮泉滋滲乎其址魑魅不若泯伏於其遠兮神明肅然
離衛乎其邇於是攘之辟之其蓄其翳脩之平之其炊
其煖上三陔以積高外四門而疏陞列道糊頰重營界
紫無縮板以作勞不藉屬而昭侈因天質之自然非人
力之攸致率兮似高山之在周邦截焉若隆睢之亘汾
澨及夫涓日肇祀於郊之宮陶匏尚質金石有容璧奠

禱以蒼蒼兮鼎啟雲而隆隆百神服食蔓衍乎坎間兮
有司守燎絜爛乎壇中穆穆天子相維辟公咸盛氣以
彊力相升降兮穹崇披大紫之莫莫招翠黃之雍雍合
蕭鄉於欽柴曳高煙乎璇穹塞天淵以隕祉奮光明於
亡窮跋乎已事罔有不恭若乃自內出者無正不行自
外至者無主不止故我率乎祖而推本正乎位而升配
使禮動乎上則神饗樂交乎下而人喜畢九州以獻力
罄一純以盡意君子曰觀天下之物無以稱其德所以

因天事天取至誠為貴則斯丘也實國家集福之清場
事神之寶時國聽之所馮厚靈心之所翔會駐魄寶於
飗歔賁黃圖之方志彼草棲列仙之館像設梵王之廬
豚蹄種祠之託鱗長九淵之居皆祠官之細祀族之餘
尚且落成者鼓吻而極嘆乞靈者舐筆而爭書叛宣父
以語怪溺丘明之好巫獨圓丘歸而遺美寧儒者佶儻
而未之思歟遂作頌曰屹圓壇赫眈眈大盤盤兮君之
升帝是饗輦而安兮禮無違福不回委如山兮聖繼聖

萬斯年長監觀兮

圓丘象天賦

宋鄭獬

禮大必簡丘圓自然蓋推尊於上帝遂擬象於高天必
在國南蟠宏基之高厚用符陽體取大運之周旋王者
揆禮之文為民之倡脩明大禘導迎景貺有祭焉格神
於下有祀焉享帝於上謂丘也其形特異我所以貴其
自成蓋天也其體亦圓我所以法之相尚爾乃旋仲冬
之序迎至日之長掃以除地升而詔王是必肇靈壤以

高峙模圓清而上當擇吉土之成基乃定其位倣高穹
之大體以就乎陽由是歡然神意交穆然天貺授徧羣
靈以從之祀嚴太祖以為之侑煥爾盛容配乎大就成
非人力聳寶勢以下蟠仰合乾儀環太虛而高覆然則
禮有物也其制可象天無形也其端可求故我相法於
厚地取類於重丘崇崇其高隱若積土之固浩浩其大
渾如洪覆之周是故有橐籥以藉誠有陶匏以薦禮大
裘焉以彰其質蒼璧焉以象其體固異周朝授政築層

級之三成漢祀命郊兆重階之八陛是則事至神者物
無以稱其德接至高者丘所以表其虔與地居上如天
轉圓對方澤之成形乃殊其象規大儀之冥運自貴其
全聖人所以明禮大原建邦茂憲兆其成迹符於至健
夫然因天事天得先民之至論

秦時賦

元
楊維禎

有西都賓問於北京主人曰蓋聞大漢元鼎之紀當世
宗武皇之二十有三年也冀州睢壤文鼎獲焉渥洼之

水天馬出焉越五年天子感神異若望見太一之神脩
禮天文而秦時立焉主人亦嘗聞其制而識其故已乎
主人曰未也賓曰鄜時之制雖始於秦人而五時之名
實備於漢氏也五色之氣雖已神於孝文而白麟之獲
實始應於武帝也維五年之冬月實維建子朔曰辛巳
而冬至在是蓋天以寶鼎神策授皇帝朔而又朔終而
復始此千載之殊值也天子於是建秦時臨甘泉取乾
位郊上玄衣尚黃玉尚瑱爾其為制也圜壇突峙仰法

紫垣方觚旁角八風外宣祔以五帝之佐環以羣臣之
偏尊以太一之禮祭以特牲之顙於時天姥練日雨師
盪塵百辟顯相千官駿奔九旗彗列萬乘雲屯羽林欣
飛之警蹕相如曼倩之草文李協律之譜樂太史談之
紀神趙代秦楚無相奪倫麟鳳龜龍諸福畢臻天子於
是次皇邸泣竹宮庭燎既張玄冕致恭望拜太一儼若
見其猶龍夕夜明於西向揖朝采於大東是時恒有神
光異氣上屬於空雲馬風車交迎並從扈羣后舞羣童

呼萬歲歌九功蓋雲合而雷同至今郊祀之志封禪之
頌登載其儀容後世雖有作者蔑以過大漢五葉之隆
矣主人曰異哉余之所聞也余聞天子祀天於圜丘祀
地於方澤圜丘在國之陽方澤在國之北配祖於冬至
祀天之時配父於季秋饗帝之夕故有虞氏禘黃帝而
郊嚳周人禘嚳而郊稷未聞祠貴神於乾位誇景光之
赫奕其為禮也陶匏其器藁秸其席黃鍾太簇之律太
羹玄酒之食貴一德之享天馨非在乎黍稷此報本反

始之盛舉豈淫昏之得以比跡也彼元鼎之好異詭天神以見之信亳人之鬼道立泰祝之淫祠襲垣平之所妄甚黃蛇之可疑日不拜於東郊褻天神與地祇貽後嗣之故事豈萬世之攸儀宜乎異時甘泉罷太畤隳畤木既拔竹宮亦披天寶譴夫悖禮神何取夫格思方今聖天子將有事乎南郊採禮於宗伯講樂於咸池子不觀光乎上國嚴簿之盛而過侈女樂仙壇龍馬騂駒之屬為衡譚之所訾者不亦卑乎賓乃憮然避席曰鄙人

不學幸聞高議明乎郊社之禮禘嘗之義吾知治國之
易也

御定歷代賦彙卷四十七

謹案第五頁前八行象胥以鐸按鐸疑譯字此沿
文苑英華之訛

第二十頁前四行半散照爛燦以成章按文選照
作昭

第二十頁後四行平原唐其壇漫兮列新蔑于林
薄按文選漫作曼蔑作雉


第二十八頁後六行頡曾城之軋軋軼萬方之熒
熒按杜甫集頡作頓方作戶

第三十頁前六行既而巒巒胠胃刊本胠訛挂據

杜甫集改

第三十一頁前六行中祚觸蹶按杜甫集祚作遭





總校官庶吉士臣張能照
校對官編修臣周厚輅
謄錄監生臣李維翰

欽定四庫全書薈要

集部

御定歷代賦彙卷四十八

欽定四庫全書薈要卷一萬七千二百六十七

集部

御定歷代賦彙卷四十八

典禮

大禮慶成賦

宋張耒

宋六世皇帝踐祚之七年所以和同天人綏靜中外

垂鴻襲裕增高累厚以對神祇祖考者固已蒙被充塞
光融翕赫六合一意四海一口無得而言矣粵以壬申
之仲冬將有事於南郊乃詔列位恪職賦事而有司建

言惟我國家因時施禮郊丘之位天地咸在牲幣並薦
禮樂合舉而古者乃以陰陽之至即南北之郊別位殊
時薦獻異數有司其何從於是天子惕然深思祇畏敬
戒曰茲大事我其敢專羣公卿士典禮之官竭思和會
以訂不易於是議者曰先王齊明以享帝而帝之享否
雖聖人末由知之惟受福者其享之占也恭惟國家合
祭天地於茲六世矣惟我太祖躬膺駿命以遏亂畧堂
皇二儀拓落八極以定萬世之業太宗威定於內震蕩

大鹵以一九有定天下於一尊真宗熙洽富盛符瑞委
積南牧之獒不戰請命威加北荒奏功岱宗仁宗席安
據厚不動指顧孽獠猾羌含毒內向吏士未頓藏竄屈
伏終始太平垂五十年英宗入纂百姓與能神考有為
六服承德此可謂受天地之福矣然則神祇之安吾享
也其久哉於是天子乃翳青雲之屋乘雕玉之輿應龍
受轡招搖翼輶建虹蜺之修竿兮颺彗星之飛游太一
執節以先驅兮二十八星拱手布武經營而周流貔貅

六師雷霆萬乘初海沸而雲湧忽山峙而川靜蓋天子
粹然玉溫健然天運望宮門而動色願執策而命進惟
烜赫之靈源兮實鼻祖於神明覽光德而來降兮館玉
宇之嚴清張咸英之廣樂備千籥之盛舞景光文徹鸞
鶴下神嬉靈豫醉爵俎翼翼清廟觀德之宮七聖在天
時降於宗世有哲孫豈弟無疆惠我文人瞻祖祐而念
功兮願禰室而感親聖考油然發中兮在位望而含辛
霽暘告旦祥飈掠塵從我髦士來祗精禋御史肅吏司

馬飭兵既逶逶遲遲雲流而日行兮又洶洶業業海運
而天聲靈旗沛洪翁赫歔霍兮攫拏龍虎而亂鯤鵬雄
驚懾威而震伏兮柔良化禮而肅清弛威弧戢天戈兮
固已熄滅蚩尤而折攬槍執飛廉圉商羊屬之有司兮
羲和磨刮披拂盡獻其光明蓋傾都空閭翹首跂足俯
窺履綦傍覘佩玉者忽焉不知手之加顙口之成祝也
於是背都城望帷宮郊垌亘其迤邐兮場圃既寒而畢
功頽青雲以連屬縈虹霓之經緯紫微下屬於兩觀勾

陳錯施於萬雉扶傾之神仰立而拱翔德之龍下抱而

曳疑神變之歟成兮涌九地而出峙連廡千柱廣殿萬

棧飛甍闢楠洞牖屹壁酸股之隅眩目之極唐洛執算

而莫計班倕操斤而自惑者類非資材於斲墁而皆機

杼之紡績也一室之用足以溫一家一宮之費何啻衣

一國驚霆之蹕既震洶壑之聲咸寂寢之靜深兮清

虛而邃密天子方端而虛儼而一多儀未舉精意已塞

甲夜始晦嚴鼓載作飛斂走伏神讐鬼愕望騰精以燭

宵兮玄冥收威而布德靈囂五震軫車將中天子乃被
袞執玉兮齊明莊栗之誠動於進趨表於形容千燎具
揚萬炬畢融上掩熒惑旁爍燭龍近為朝暘遠為融風
赫赫曦曦煌煌輝輝列次之士野屯之師歸如酌醕醪
而御兼衣黃流汪洋璧玉照徹祥祲衡布協氣下浹音
為樂和形為人悅白質之獸簫聲之鳥紛披雜沓應奏
而舞節陟降既周燎煙始升奔星走虹奉璧薦牲豐隆
奔馳而仰驚兮祝融焜煌而上征開闔闔兮闢青都后

帝燕兮百神愉圓錫蓋兮方獻輿岳輪固兮溟効濡於
是禮備樂成整車而旋萬類環極端門闢天賞出千庾
恩流百川北包大壤南盡島蠻西越流沙東窮海壖令
未脫口雷運風傳野無窮人獄無宿愆破械解縲負帛
囊錢車反其舍士復其位効技呈才千饒萬鼓天子舉
酒以屬羣公咸曰休哉天子之功系曰於穆聖主建皇
極兮嚴恭精禋帝來格兮柔祗並位儼牲璧兮文祖右
坐臨有赫兮於惟祖宗有常則兮諱兵畏刑後貨食兮

政有損益茲不易兮帝則鑒之戩穀錫兮兢兢業業曰
一日兮三載一祀年萬億兮

元符南郊大禮賦

宋 劉 弁

粵若溟涬鴻濛之始登魚奠獸肇豺獮之知圓顙方趾
厥協精純肅專於是乎有祭及稽諸載籍則郊之禮尚
已傳曰帝王莫大乎承天記曰惟聖人為能饗帝以其
祖配則七代之所更立如指諸掌者蓋明乎郊社之義
虞夏商周胚胎前芳鯀冥嚳黃用詔於後厥惟舊哉及

陋者為之則誣天贅祖神醜雜擾其語弗經見搢紳者
不道九天太一三一八神則方士之說試黃蛇白帝陳
寶鳴雞則秦餘之祀舉或龍馬禹木或待我而五或遙
拜竹宮或偃子旁午故漢三十年間天地之祀五徙而
稚圭之徒罷去四百七十餘所有唐末造闕漏莽鹵殆
不足數是則數千百載寂寥無詔之濶典誠有待乎我
宋七世彌文之真主矣昔者五季不綱蕩去典制遇民
則難氏刈草置國則累基十二雪桃薦屨顛倒本末飲

羊璞鼠庚膺竄真盛鶴列者羞縣絕笑章甫者高惠文
翼飛虎使婪食冠沐猴使搢紳慄慄遺黎沸糜擾雲柴
薪燔之弗嗣丘故園而益泯凡時君惡其害已也十去
八九而先王所以揭虔妥靈者其間僅存雖有天成長
興之祀圖固已恇悞趨趨翦翦焉獨奚補吾世之討論
哉我藝祖之初也皇武奮張拱揖宅師奠九屋而業萬
世支傾柱而紐絕維道寵德絡藥瘳疴疲於斯時也武
而未熙太宗熙文僕我景命汾晉江吳以次係頸去鼠

第之苛僞茹黃之諍於斯時也熙而未定維真底綏謐
寧貯祥儲休汾睢云亭於斯時也定而未成然猶一祖
二宗或五或三嚴配昭升往遵於南曰仁曰英承憲履
繩乾酬坤咎穀不及停爰迨神考基命宥密釐正丕誕
無文咸秩丕促陋典蓬胞獨飛翬而造質上咸五而下
登三墳作四而籍言七更載十九上儀越軼則有元豐
之祀典存焉及陛下繼之也履紹聖躋元符轡夏子觀
唐虞童劉李廝魏吳埽攢蠹如殫涇開夷軌乎破觚臬

後夔前履錯珮摩洗渭巢箕來游來歌懟往者易頑顏
而鑿方心跼新者飫淡泊而醒醇和摩同穎之秀而穀
人腹沐塗旁之枝而桑者衣霜顛卒齒而不兵黃吻嘯
儔而裸嬉裛衣短後羽襦祗裊陶冶於既醉風胎雨鷺
灌莽苞葭長懋乎由儀雞犬之聲相聞鳥鵲之巢可窺
若乃史不絕書則甘醴歲滴華滋霄零奔精標南而照
老榮波醜曲以薦清緇文黃輝素烏朱英四肩九尾不
可殫名衆來致福則髻首鍍耳之俗頭飛鼻飲之鄉濮

鉉僂卧之酋長戴斗蠅蟻之名王解辯削衽踵係乎職
方然猶雍上久虛傳國壽昌之玉刻譙赫申旦下貫不
揜之景光仙驥儷翼於武夷駢竹笨箏於豫章是謂應
期紹至不特創見豈徒諸福之物可致之祥也邪聖上
則攬龐禧初矍然諏挹損採撫謙休哉孰為此者我則
歸賴於天於是條頌祇之書下發中之詔天姥之日練
掌故之儀草即是歲之冬至將有事乎南郊之兆禮也
先是齋宮僅存翼以縵城有司弗虔柱頽支傾天啟人

基厥營端誠觀夫端誠之成也司空亢徒太史揆星審
曲面勢匠人是經爾乃計工俚課匠石順陰陽衆材度
霰屑雨沛聾山噓壑協庶民之子來歡百堵之皆作於
是桴木姑繇之墟薦舄苑蓬之巔負瑤光而捫太一走
神皋而眺綺阡飛馱軒軒而鵲起脩梁亘空而虹蜿左
平右城青瑣綺疏的皪連蜷承阿結隅叢芝栢與繡凜
燿賦白而駢朱銜環躍楯千詭萬殊豈惟仙靈雲氣倩
練而霍靡厥有飛廉翁仲矚睽而睢盱其前則崛起泰

裡瞰臨朱垠象嶢闕之中天疑徙居於化人其後則崇
墉屹屹配以拱極嘉德中豁揭之金勒承和迎禧左右
迭掖告虔則寅明東峙表事則肅成西直銅題釳砌微
道外周扶拱棲廬陽烏陰蚪狀鬼峨而萋葉吁欲擲其
中留然而高廂嚴除竄窳靚深舒紫蔭之弈弈眴清思
而愔愔卷皇明於寂照攝睿念於幽襟於此而疏淪澡
雪則見其所為齋者於此而觀天地萬物之復則履新
陽於故陰於此而朝羣臣則壯萬乘而取威重於此而

申懿鑠則有嘉德而無違心是謂一舉而四善得豈比
夫子雲甘泉窮物怪而誇麗淫者哉然後前期七日受
誓戒飾戎容命掌次使設邸詔封人使壝宮請中嚴而
奏外辦毋不恪以彙臣工款原廟而朝祐室龜食墨而
吾從是日也改天步仗黃麾服大裘翳華芝巾玉輅駟
秀騏撰清旂旅飲飛平盤廓以獲畧兮纓帶颯而歲蕤
絢綢杠之孑孑兮右闔戟而左青旂百神警而陪衛兮
千官儼以襍褻於是雲罕啟行幟弩射私褻稍星羅柯

舒鱗差鳥號夏服星鎬月弦跳盪唬闕震震闐闐塵不
漸軼委如注川初逗隘而取寬俄舉中而色偏清蹕曳
聲而肅譁班劔竦飾以陸離鼻獸獻馴而雅拜天驥睨
雲而嚼羈黃道端以綢直兮下朱雀迤南薰物色別之
五衣兮翕焉綺錯霍焉霞分貫裂闕以靡旃兮哄闔闔
而噫輪詰蚩尤使當兵兮戒雨師使清道坐波涌而燎
揚兮默霆吞而鯨宵爰簸丘而跳巒兮怵神騰而鬼趨
辰十二以效時兮車抗指而司方蓬勃鬱蓊蹂以戢晉

兮半岬叱綽沛以相羊騰蛇白澤詰呵神姦兮桃弧棘
矢攘却不祥決旬始而埽攬搶兮飛蒙茸而走陸梁爾
乃賁諸之儔拘怒立發跋扈睚眦陰伺微察鏤朱涅墨
裂皆直髮當之者糜碎過之者氣奪曾徒手之不抗況
臂弧而腰鐵於是乘輿之至端誠也適晡焉然後金吾
誰何挈壺警昏雞人叫巾車而呼旦太宰眡被濯之前
陳物告備攢題揭寘蒼壁豆登設器陶匏席橐秸牲孔
時酒醴潔時也天形束磬萬籟寂絕玉繩低隅而黏波

霜華飛清而漲闕蒼虬蟠閨而不動燭龍噴垆而布藝
班馬蕭蕭七萃卷舌絳紗萬枝扶鑣夾轍烘麟髓與鳳
膏邈珠還而電掣天子乃步自大次暨小次而須焉左
延右揖樞臣禮官以引以翌遂造乎壇端柴煙升帝謔
寫靈斯游下風馬藝祖是配禮無遺者百神受職魚魚
雅雅將事之臣罔敢不共肅骨嚴顏秩秩顙顙弁匝首
以星俯球飾趨而鸞雛若乃堵以備樂磬簫笙鏞孤竹
之管其宮園鐘狎獵後先翠葆崇牙宣和播粹金支秀

華般裔裔以依永貴人聲而登歌以亞以終飲福受祚
熙事備成燿火斯舉御端誠而大朝會於以篤萬世無
疆之祐於是屬車改轅先驅復路乾熙坤恬協泰齊豫
疏祥飗而舒徐蒨游雲而布獲奪騁目而醉夸心抃數
足而蹌林羽千乘萬騎不暘而暄望彷彿以依約至徘徊而蟬聯霓衣差綵以暗地雲韶紆聲而撲鄽車轍馬
跡無取獨謠白雲之穆滿驂龍駕鳳尚陋按行蓬萊之
列仙上乃御應門弛金科天德貺百福荷鏗萬石考靈

鼂奏隆安協猗那皇心懌賜顏色揭雞竿繫囚釋堯言
布漸動植翔仁風滂睿澤紬繹祀典攬蒐潛德興滅繼
絕蠲逋已責徧存問乎高年秩牛酒與束帛於是歡呼
之聲沸渭鏘洋億庶千官環瞻赭黃慰若大旱之望雲
霓榮若湛露之晞朝陽快若庶鳥之宗鵬鸞竦若衆山
之景嵩常也今夫施洪者報斯腆德茂者禮逾文其事
則丘上帝而廟祖考其教則尊尊所以為義親親所以
為仁然而博碩肥腍亦或吐諸則貴德不貴物齋戒沐

浴有取乎耳則在誠不在人豐茂省則大饗不足以大
旅牛慙禴則東鄰不如西鄰此固元符所以材兆物瑩
吾民時斟酌攣精真陋前代而講嚴裡也頃歲宗祀明
堂格於蒼昊裒對神考既往之聖孝也間者爰兆北郊
媪神是報以須敬造方來之順道也今又睹夫端誠之
宮宮搶空跋巖方地此而天則擁和纏休實神明之所
相勞非曠古盛德效邪茲亦羸國削君冗儀細藻羌不
可得而匹紹也且夫留滯周南馬談則沒有餘志當君

而譽堯舜亦將生之所深恥正得春而不孝信竄艷頑
亥而已矣況若小臣親陪祠祀苟蟄吮而固毫持此將
復誰諉不其鄙歟敢拜手稽首而為之頌曰瀕洞蒼莽
辟元精兮陽司陰覲無臭聲兮契彼自然壇園成兮百
聖差軌歟拳擎兮宋更七世邈飛英兮紛綸煥爛賁朱
垌兮瓊開金閣踴端誠兮蹂漢轡唐奄上征兮帝謚肅
將臻百靈兮倬彼慶霄薦清明兮於焉降格若見情兮
自時厥後福岡陵兮若之風雨妥日星兮臣夷妾狄寢

五兵兮疇蟠縈稼坻京兮顯允天子我民寧兮於萬
斯年揭鴻名兮

壬申歲南郊大禮慶成賦

宋程秘

皇帝御寓十有九載與今為再見於上帝惟王者父天
母地尊祖配天顧已疏於三歲矧克脩於十年我藝祖
之膺圖秉籙也道冒六合功該八埏儒臣夙咨合饗載
嚴破前王之陋揭來世之先前期裸鬯至日潔蠲於穆
太宗重華比隆歲元叶吉二祖並崇列聖揚休是則是

共感生配祀火正奉祠興國顯太一之祐咸平昭五帝
之宜熠燿皇文森羅帝儀炎祚中興熙事孔明偉上聖
之繼照顯睿德之升聞中更孽臣胡然弄兵攬槍搖空
戈鋌滿地宮而不郊禮廢以隆倬彼元臣運膺泰亨天
子善任英明不疑和氣充塞抃蹈布野年穀豐衍災沴
消伏日月燭乎幽衢雷雨灑乎寃眚爾元老兮以蒲為
輪爾雋髦兮復招以旌拔偏裨兮人自期於衛霍之列
秉圭符兮家不遜於龔黃之名日月功兮課中材之士

拘攣脫兮待非常之英鬱然龍翔油然霧蒸用能包藏
之姦天發其橐千紀之夫神趣其縛豈曰無幣兮今泉
流豈曰無粟兮今紅稠稱鈞衡兮物不頗解琴瑟兮聲
惟和天子曰嘻爾相之力元臣拜手我后之德天子不
居薦之上帝乃稽玉厯乃練上日歲紀之申日至之辰
先成乎民乃及乎神奉牲以進博大以碩奉粢以登有
芬其苾祝無媿辭天其饗必時也絳闕天低宮壺漏遲
六龍雷動千官影隨原廟先謁圓丘載祗奠奉雲陽之

璧瑞陳宗伯之珪露凝冰簋雲飛寶彝虞豆夏簋壘酒
象醞肅肅乎觚壇之靜洋洋乎英莖之遺龍章兮袞輝
玉采兮旒垂天容兮雍愉天步兮委蛇臣工巍峨環佩
參差玉鱗金猊燔燎煙霏神光若交對越靡違永言配
命流慶丕基禮成樂諧人神以熙宗卿奏畢殿監授衣
已乃輅車繁纓龍旗日昇清蹕警蹕周廬撤星登龍翳
芝蛟螭螭騰鸞駮豹尾黃鉞金鉦月卿按節九軌塵清
乃御端門乃宣翼澤陰山瀚海杳無垠域頌聲滂洋流

祉融液此人之和也六花先紛前星澄彩寒氣霽嚴晴
光散靄數點灑空適當肆沛此天之和也天人並和歷
數無疆天子萬壽元臣作朋靈監觀下方外慰寧答天
洪休宣烈斯人益彊不怠吾相吾君丕休哉唐虞鳴和
明良載歌惟唐有臣亦賦南郊矧我朝文學成林鋪烈
揚芬寧遜昔人望雲章之玉冊想翠鸞之芳塵是用作
歌憲世千億宣之樂章刻之金石

郊祀賦

元傳與礪

惟至順壬申十月之吉大臣既奉明詔祇嗣皇承天命
率舊章雲合九族日臨萬方紹丕基於既遠衍休運於
無疆乃稽典籍陳禋祀戒有司飭行事謀泰龜以時日
薦純牡於天地於是春官議禮庶職效能考壇墠於陽
位辟氛埃使清明垣繚丘而規合石縣砌而方平組帷
繽其綺錯氈邸翼以相承洞百靈以趨走齊二氣與降
升犧牲既成粢盛告潔赤精召陽燧之火素液注方諸
之月黃琮掩藹而霞潤蒼璧泓涵而冰徹是皆將以表

至通明靈罔不因清濁以辨位仿方圓而成形也皇帝

方以春秋鼎盛肆命重臣攝行大典載弁星羅飄裾霧
卷對越上下潛交幽顯儼臨壇而翼翼躬服事以勉勉
凡百多士亦肅且和駿奔就列佩玉委蛇御史執法曰
糾其儀端白簡以山立鐵柱冠其嵯峨於時萬境凝淨
羣聲閒寥星翳翳以沈漢斗遲遲其轉杓樂舉兮應律
煙登兮干霄天門開兮紛照耀靈之旗兮下飄飄般縱
縱以振霧芳菲菲而揚颿爾乃酌以玄醴藉以白茅三

解迭進八音不涓蜺龍夭矯於寶籙威鳳翩聯於雲旂
祥光煜以浮宇景氣郁其覆郊禮言備神具醉揚空歌
旋靈旆神之來兮陰陽會神之去兮福祿萃昌皇祚兮
彌億年世修祀兮永弗替籩豆既撤百僚降止工祝將
昨致嘏於天子浩浩乎洋洋乎莫不鼓舞元化泳涵恩
波用昭明於靈貺咸稽首而作歌歌曰帝承天休膺大
寶兮燔柴於郊假穹昊兮慶雲下流被百草兮羣黎熙
熙安以老兮崇德罔休以永保兮

郊禋賦

明 鄒德溥

伊方儀之博厚兮統玄形而承天苞萬彙以函載兮德
上配乎重元維曜靈躔於陸南兮伯趙呼景風其應序
帝將乘離而大報兮駕之方澤乎奠秬於是使馮相歷
日兮司樂宿懸奉常傳戒兮掌次張璫秩宗條頌祇之
書兮太宰總揚職之警蹕人共玉璽之飾兮司膳奉繭
栗之省帝服皮弁而誓戒兮又爇蘭芳以發咨穆然淨
齋心於宿設兮儼若瞻乎柔祇詔飛廉使清塵兮敕豐

隆以灑道前望舒而後鈎陳兮益之以蚩尤其秉燾司
塗汜埽以新衢兮田燭耀而如星雞人呼晨以叫百官
兮巾車應而鳴鈴於是升金軒兮撫天僕揚六鑾兮齊
八駟璇蓋參麗以雲浮兮太常膠臘以電燭扈帶蛟函
兮旁轂六軍袍服兮驟行重英曲騷翕以赫兮雲罕激
燿火而納光騎轟騰而駢隱兮夫何馭遺風而追電也
倏習霍而壯泰圻兮百靈蓋汎榮以竚奠也帝乃服大
裘之霽煜兮秉鎮圭而如墮握鸞刀以啟骨兮奠黃琮

以為儀犢與繒往往象色兮圭兩邸以從數奏太簇而
歌應鍾兮又綴以咸池之舞琴瑟材之以空桑兮管絲
竹而鼓靈鼗藁秸蒲以藉席兮薦菹醢以陶匏朝踐酌
泛齊於瓦甌兮宗伯攝而獻醴饋食申之以盞齊兮又
亞以匏爵之醕次泛與醕其更獻兮歷沈齊而七之樂
續紛其迭奏兮恍焄蒿兮在茲洪臺崛其獨隆兮瓏文
疏而金耀鵠翔虛以迷影兮忽不知其酷肖折薜荔以
為脯兮羅杜蘅以為染紛吾既備此芬芳兮泣瘞瘳而

薦犧召天孫於石閭兮呼海若乎巨壑起天吳與陽侯
兮縶雲陽而徧索曰爾膚功之在民兮罄埏垓而胥懷
予既奄有此廣輪兮茲用修報乎瘞埋眇濮鈗而盼祝
栗兮延佇乎邠國與秦遠庶搏搏總總以來馨兮鑒予
心之繾綣於是地垠開兮揚景輝來八極兮臨方扉飲
明水之清泠兮嘗黝牲之脂肥祝融穆而肅侍兮恍若
萬仞龍旋而干雲靈胥澹以中停兮又似乎重溟激灩
而沃日石麟天矯兮團翠煙而率舞跕鳳雛兮依清

風而和律瑞蜿蜒於越席兮祥光熠乎金根既薦享而
畢事兮乃斂昭華而迴軒染既成兮神具佑羣鶴留兮
獲異獸雲霓霽兮雨滂沱懋百福兮錫萬壽辭曰戔戔
方丘隱崑崙兮肇裡嚴祀萬乘屯兮衝牙錚鎗泛大樽
兮聖心穆穆嚴邃密兮樂奏八闋地祇出兮神光剌剌
福祿植兮繼繼繩繩千萬億兮

郊裡賦

明楊元梓

帝秉圖而御宇兮翔仁風於一紀坤軸奠而常寧兮泰

階平而若砥嘉禾連畛以鋪芬兮甘泉湧而若醴西棘
納賁於白環兮東溥移珍於桔矢洵闡澤之遐暢兮乃
聖心虛而弗恃曰惟玄功之默佑兮俾予一人以臻上
理秉宿心而告虔兮展明禋於返始既觴享於蒼郊兮
復薦鬯於玄趾惟闕逢之馭歲兮望舒亦亘於敷牂律
方應於蕤賓兮正大火之當陽旦初麗於蒼龍兮昏玄
武以為房景風煽於南陸兮旭日高標於穹蒼乃命羣
僚以稽舊典兮將紹虞夏而續皇唐大卜奉龜而揆吉

兮宗伯秩祀而陳常闢陰澤而展玄郊兮將致禮乎地
皇屬靈辰之既屆兮筮吉日其惟辛雞人徹漏而送曉
兮初日上而如輪攝豐隆使御駕兮命雨師以清塵六
玉蚪以扶轂兮鳴八鸞之振振抗蜺旌之歲蕤兮曳虹
旃之繽紛朱鳥晃朗而錯映兮犀甲雜遝而嶙峋屯千
轂以霆轉兮羅萬騎而星陳赫皇儀之孔肅兮瞻泰圻
之咫尺總七萃以連鑣兮齊九旂而按筴炎炎焮焮以
先後兮不踰時而至乎方澤惟皇精寅以肅穆兮躬孝

享而永神休被九章之赤黻兮垂十二之冕旒端玉珽
以告虔兮御葩璫之大裘寔山壘以薦酒兮援有邸之
二球盥明水以表潔兮用陶匏以象之升方鼎以陳羞
兮縮白茅以藉之歆黃琮之甫薦兮鐘鼓鏗鐃而交振
太簇奏而雪飛兮應鐘歌而風迅夏雲和之寶瑟兮吟
孤竹之清韻舞咸池而容與兮三犧五牲而迭進肆瘞
禮之告成兮展緹帷而返旆引太常之朱旂兮迴夷庚
之翠蓋迨旋馭於九重兮瞻祥光之靄靄惟閭闔之晨

開兮百辟嵩呼而虎拜曰惟坤元之資生兮共乾元而
交泰后函三而為一兮湛恩旁流於無外矧遜美而弗
居兮曰化工之是賴宜純嘏之敷錫兮誓河山而礪帶
陳夏諺而續衢歌兮托鼓缶於天籟頌曰漫漫方輿配
乾象兮含弘光大萬物養兮有赫北郊洪以敞兮惟帝
嚴恭昭殷享兮神之格思垂靈爽兮巍巍皇圖配地廣
兮

大祀圜丘賦

有序

明
廖道南

嘉靖庚寅十一月丁未上御齋宮裡祀昊天上帝於圜

丘臣道南奏賦疏曰伏考洪武四年十一月丙辰我聖

祖高皇帝祀昊天上帝於圜丘諭羣臣曰帝王奉天以

君臨兆民當盡事天之道今朕以冬至祀圜丘夏至祀

方澤以報覆載之大德惟夙夜寅畏冀精白昭格庶陰

陽和風雨時以福斯民五年十一月辛酉祀圜丘禮成

於時儒臣咸為歌頌宋濂序曰皇上據禮經洗千古之

陋每歲親升泰壇昭事上帝恪恭寅畏有赫其臨陰斂

陽舒降甘風雨覃及寰宇物無疵癘聲歌之發非其時
乎八年冬至天降甘露於圜丘聖祖親製為論命儒臣
各詠其事以彰厥美至十年觀心亭成聖祖復命宋濂
記之臣嘗莊誦竊嘆以為我聖祖之垂諭於下也惟以
格天福民為念而當時儒臣之納忠於上也惟以順時
澤物為言視唐虞之都兪寓警戒於膚歌商周之雅頌
存敬畏於祝願其道一而已矣恭惟皇上體法聖祖光
復圜丘之舊制祇承大報之盛典聿興禮樂允協神人

甘露風降於往時靈雪應期於邇歲嘉禾秀麥疊見禎
祥雲慶河清薦形歌頌是故天心歆豫人心懽忭固有
徵矣然上天以好生為心人君以大生為德易大有之
象曰火在天上大有君子以遏惡揚善順天休命无妄
之象曰天下雷行物與无妄先王以茂對時育萬物咸
之彖曰天地感而萬物化生聖人感人心而天下和平
泰之彖曰天地交泰后以裁成天地之道輔相天地之
宜以左右民今天下疲癯困苦之民與夫遷謫悔悟之

臣數窮理極陰剝陽復此其時也皇上憲天聰明體天發育值茲陽長之候渙頒仁覆之恩建中致和以孚大有之義體信達順以推无妄之誠感山澤之咸而膏澤遍敷於四海交陰陽之泰而協氣克暢於兩間中庸所謂致中和天地位焉萬物育焉邦其永孚於休矣臣荷蒙聖明簡列侍從執經講殿仰知帝學之淵源珥筆詞垣快覩宸章之炳耀惟天為大煥乎其有堯文如日之升允矣其躋湯敬臣職專紀載喜溢揄揚茲遇郊禋精

意之時上獻聖德純誠之頌昔宋臣范鎮有大報天賦
宋祁鄭獬有圜丘賦乃倣其體裁繹其名義謹撰大祀
圜丘賦賦曰

大矣哉乾元之至神也混沌未分太極涵乎真精闔闢
既形至化運乎神明於是乎二氣凝四象著五行順三
才具周流六虛而沖漠寥濶曲成萬物而龐博惇裕是
故明明在上帝宰命以覆羣生赫赫在下君建極以牧
萬民儀而式之亶無聲而無臭化而裁之實並育而並

行粵稽諸古代作神聖義農履元軒轅麗正堯欽若以
授時舜時幾以敕命禹惠迪以敘功湯昭格以躋敬文
緝熙以順則武祗承以執競是故其事天也或則圖推
策以觀玄化或被袞垂旒以象蒼昊或洗心澡德以將
明馨或報本反始以彰靈造蓋圜丘之祀與天同體誠
悠久而無疆命於穆而不已遐哉邈矣其所由來者遠
矣我聖祖高皇帝首握真符肇建圜丘於中都時則月
壁星珠樹駿業而訏鴻圖暨定丕基載建圜丘於南畿

時則海潤雲輝革虎變而乾龍飛迨我皇上敬天法祖
執一御萬超三邁五出震繼離以申異命履恒昭賁以
開泰字乃歲上章貞於攝提月臨孟陬日會娵觜皇上
淵衷默契睿思先知昭告皇祖穆卜泰著協靈龜之攸
吉測顯象之咸宜乃稽彝典發明綸下疇咨旁周詢天
章燦爛而星斗輝宸藻溫潤而雲雷屯於時親而宗藩
貴而勲戚近而六卿庶而百辟內而黔黎外而蠻貊罔
不適觀厥成允承休德胥與覲耿光而揚大烈也乃於

仲夏日之方中律旋蕤賓令屬祝融皇上致其精誠達
於昊穹乃命宗伯乃召司空諏良辰以爰始擇吉土之
是崇乃啟郊壇詣天門闢九道循三垣土圭測景而正
方位水臬定勢而登平原於時封人畫疆匠人營域山
虞掄材土方辨脈雍氏芟草柞氏攻木罔不悅以趨事
勤以効役胥與贊皇謨而宣帝力也乃於仲冬月之既
朔大工告成輿情咸樂皇上夙興恭視益秉虔恪乃駕
鸞輅乃次龍幄步台階以周旋瞻泰時之遼邈乃陟太

微謁上玄躡黃道凌丹躔於時曙旭熹微祥煙晦靄文
列鸛班武聯虎隊萬旅忻躍兆民懽戴罔不合辭稱慶
同心興愛胥與頌成功而歌昭代也是故以言乎其為
制也其內則三成切雲九陞干霄四門閭闔兩墻迢遙
爰有雕玉為欄綺石為祀碧瑤為砌玄礪為城南箕北
斗而魄寶華西奎東壁而瑤樞麗其外則神庫閼恤神
廚整潔天池齋泐天井清冽爰有篝燈之臺望燎之爐
宰牲之所滌器之區涼飈披拂而陰幽潛佳氣蔥蔚而

陽明乎是故以言乎其為位也天帝端嚴宸極正中神
牀嚴肅御案豐隆爰有皇祖配位龍椅交張臨之在前
質之在旁洪功俊偉而放勲齊峻德廣運而重華光其
次則大明朝暉王宮兆東夜明夕魄冰鑑懸空爰有經
星緯星周天在茲雲師雨師風伯雷師九虛縣眇而霞
馭翔萬靈翕合而飊車馳是故以言乎其為禮也其器
則蒼壁瑩澤玄酒澄清帛出素絲爵蘊玄英爰有太尊
著尊山罍犧尊太牢少牢太羹和羹質用陶匏而古制

存藉用藁秸而淳風形其節則太常贊禮太祝宣詞典
瑞捧玉典祀陳儀爰有鬱人薦鬯幕人張帷司烜取燧
司尊奠彝駿奔對越而精意歆升降拱揖而矩度宜是
故以言乎其為樂也其器則玉斯編磬金斯編鐘祝敔
斯木琴瑟斯桐爰有搏拊鞀鼓簫管塤箎干戚舞佾羽
籥文麾龍箏偕鳴而六變格鳳笙迭奏而九成儀其節
則黃鍾乾父林鍾坤母子已陽律午亥陰呂爰有清宮
清角清羽清商韻諧雲門氣應星房天樂鈞韶而清籟

發地雷奮豫而元聲揚猗歟盛哉我皇上之受命於皇
天也純粹天性剛健天行含宏寬裕而體元以敦仁者
如春之生齊莊寅畏而嘉會以崇禮者如夏之亨弘毅
嚴重而濟物以由義者如秋之成淵微宥密而貞固以
建功者如冬之貞沛乎其優渥而兆民被其澤也如雨
露之恩赫乎其震肅而四夷服其威也如雷霆之聲卓
乎其中正而萬世以為法也如二曜之明煥乎其炫燿
而萬國觀其光也如列宿之精我皇上真與昊天為一

道矣昔者黃河清於丁卯慶雲見於庚辰甘露垂於戊子五星聚於甲申靈雪三白於己丑瑞麥五岐於庚寅千祥駢集萬寶畢呈豈恃豐而罔戒實有大而不矜仰參乾運允協皇心謙以保泰約以持盈功以學懋志以道寧旰食而日旰宵衣而夜嚮晨茲當長至大報中升先事而躬習禮儀屆期而特視犧牲致齋而顧諟天命禋祀而克享天心肆赦大賚而天德好生慶成大饗而天道咸亨是故至誠無息至德無垠至仁無外至治

無形至禮無讓至樂無聲而開我皇明億萬載之太平
也臣稽首頓首迺颺言曰於皇皇天萬物之祖峻極高
明溥博悠久於皇皇祖萬世之師道超今古威震華夷
皇天眷命皇祖垂祐篤生聖人亶作元后入紹大統首
正大倫惇典庸禮發政施仁祇復園丘肇崇殷薦祥開
台斗光回雲漢禮全大體樂備元聲俯升燔柴仰歆太
清燕舉慶成上下交泰湛露香凝需雲瑞靄顧茲陽長
元氣發生陰陽和暢日月貞明大號渙頒對時育物省

役蠲租闡幽宣鬱登崇俊良秩正紀綱百度惟貞四夷
來王惟德動天惟天監德前星炳耀子孫千億惟孝法
祖惟祖配天永錫胤祚億萬斯年

恭祀園丘賦

明王梅

猗我明之撫運兮垂十葉而皇皇覃鴻休於八極兮昭
靈貺於蒼蒼粵聖人其繼作兮飛六龍於湖湘握貞符
於一紀兮懷百神而有常乃詔祠官乃飭郊壇曰朕心
之巨疑而陰陽之義欲辨析於毫端顧纓綏之並陳紛

總總而攬攬咨儒碩之據經排羣疑而獨前天子乃正
同牢之譌誤定大典於不刊鬯六合之中孚悉萬靈而
告虔可謂總條貫於欽明析淆亂於衆言者也歲在壬
辰仲冬之吉日長至於南郊微陽動於葭室蓋大報之
宜行而聖心之攸惕銅人執簡當宁有翼屏政潛神崇
虛主極斂視聽於精禋祓喧阗於百辟如是者三越日
焉而後金門曙闢袞服晨興法黃虞之格藝祗九廟而
告勤爾乃振玉輅之殷麟翳華芝之飄搖金貂翼輶錦

校扶輶建螭蚪之羽旆兮拂雲霞之輕綃儼肅靖之前
導兮舞迴飈而飄飄二十八宿五岳四瀆之旆旗迴環
矗擁紛不知其幾許兮目暝眩而相交列黃麾而豹尾
響儀鎧之玉珰被毳罽兮馴象山回而嶺峙耀障泥兮
仗馬雲滿而川遙於斯時也豐隆排雲雨師汎灑風伯
剡然其先驅曰馭隨車而散彩方疾雷之轟殷兮繫萬
乘之初動也俄貔貅之奮武兮伊六師之齊發也何乾
運之不息兮指重明以麗正也於是踰金水出崇墉望

清都戾帷宮初海運而天聲忽秋肅而春融奉圭豆者
受成於豸史列陛楯者屏息於元戎爾乃達觀於郊丘
也廣矣大矣不可述矣上鬱律而摩鴻濛兮下混龐而
當地軸外翼騫而雄張兮中深闕而無蹟廣連廡之千
柱兮繚周垣之相屬眇八觚之直上兮倚青雲而盤矗
爛蚪霓之夭矯兮拂祥飈之回複恍朱鳥之可摘兮謂
南極之在麓魑魅屏跡而遁藏兮太一勾陳呵護而清
肅疑神變之倏成兮非人力之所築蓋翹首之久不知

股之戰慄而肌之生粟也義和弛御候人告昏甲夜寂
寂齋宮沈沈天子方儼而一精而真盥而不薦直內惟
寅留心於逆釐之事初未嘗天天而申申也既而絳幘
呼旦靈龜三嚴玄冕戔戔大裘檐檐出自齋宮穆穆登
壇司烜告期萬炬畢然熒惑逡巡而泯耀祝融忽霍而
相先太和之鐘厥音維洪鯨吼龍吟殷殷隆隆吉事爰
始燎煙方通合蕭薌於焦蒸何奔星而走虹闢天閭以
受祉昭苾芬於璇穹蒼璧秩秩黃流崇崇三陟三降棣

棟雍雍陶匏十二而豐質雲和六變而始終近可追虞
廷之盛而陋矣非矇瞍之工是宜冥頑之獸瑰譎之鳥
莫不率舞而噤噤蓋從我髦士駿奔顒顒而列屯野次
之卒庖翟宰夫之賤迄於竣事而惟恭可以見聖人之
能享帝而錫羨於無窮大禮既畢乘輿乃旋萬姓環門
九衢摩肩蓋傾都而塞道咸仰聖而瞻天幼始於髫鬣
而老至於華顛遠而極於離身反踵之渠帥穴居水處
之蠻蜚竊觀羽儀而側聞車馬不知額加乎手而口頌

乎萬年爾乃推純嘏昭受釐斤大庖開天府敞奉天之
弘啟闔百辟而宴之饌珍玉兮芬芳壘瓊漿兮淋漓羌
三台之接曜紛委珮於彤墀於以見太平之無外而或
雜乎荒服之蠻夷莫不泳仁而醉德含和而揚睂臣乃
惑堯天之廣大駭周典之崔嵬初洩洩而融融忽惶惶
而徊徊有一二者碩頤謂臣曰子豈非蔽席隱茅始脫
乎戴盆雕蟲守蠹未離乎窺斑者哉烏貴乎觀國之光
也子少須吾其語子夫聖人之於天也默誠以通顯欽

以將方淵澄而龍見本敬一之惶惶斯誠神而屈遠夫
何適而不臧蓋將震一索兮得男離兩作兮重光誕主
器而執鬯兮邈宜君而宜王豈止彗消於東井之分兔
白於蟠龍之岡哉臣俯而拜仰而歎曰大哉精乎信天
人之如響也遂從而歌之曰於赫我皇作而聖兮有圉
者丘式稽古今紹帝自中福穰穰兮妥斯武斯聖復聖
兮億萬斯年有事於茲丘兮

擬北郊賦

明
葛 曦

帝握圖之一紀鴻號熙以遐宣皇猷屬乎穹昊至德邁
於深淵四時成序九有安瀾素毳赤莖紛呈竒於川嶽
兩岐雙穗屢驗瑞於隰原河海振兮不洩華嶽載兮不
騫亶博厚之效靈配高明而罔愆睠方圓之合德宜分
祀乎長安制沿隋漢義採譚玄既升祀以明大報爰埽
地以奉嚴蠲是月也星臨危度日麗秦分炎帝司令祝
融炳神節屆長日律應蕤賓鳴蟬鼓翼游牝別羣林含
煙以蒨翳華綴露而繽紛善萬物之得時睹神功於坤

元象彼百辟卿士山川百原百縣猶然其秩祀伊茲神
州厚載磅礴渾淪而可已乎明禋於是太常卜期宗伯
陳戒協吉日於靈辰致齋明於淵沕設御幄於太極
侍衛其嚴隊翕流霞兮飲露英芳瓊枝兮席薜荔五
品儼其袴褶羣工結其帶珮已乃金吾視壇禮官時邁
列位次於墻前修樂舞於懸內罇罍篚罍之器燦如星
羅山川嶽瀆之神紛若雲霓饌帳施兮委蛇黃流注兮
沆瀣犧牲成兮粢盛潔藁結設兮迎祖考而作配爾其整

藻綵正紘紼陳鹵簿設宮懸金根宵飭瑤輅朝嚴立戈
迺戛璚弩重旃羽林森沈以勒騎虎賁肅穆而控弦召
風伯雨師以除灑驅勾陳蚩尤而靜涓夔魑罔象杳不
知其所之複道紫宮靄淑氣之澄鮮於是太僕執輿皇
帝升輅疏轂飛軫時服設副咸龍旂而繁纓行蒲梢於
上路七萃警蹕千牛馳騫天行星陳雲從景附蹶北門
而東馳屯騎羅而星布鼓吹不鳴諠譁不吐將泰圻乎
至止望方澤而趨赴帳殿開今天龍翔帷宮駐兮百神

護已而星河欲曙羣后四朝卿奏質明上易袞袍乃報
功於陰澤肆展禮乎玄郊遡崑崙以迎神瘞毛血以潛
交邸兩圭以象數旅四望於清霄奠黃琮兮鎮瑞鼎黜
牲兮升庖斂檢玉而具瘞琛敦質朴而器陶匏鬱鬯兮
玉瓚縮酒兮江茅於是太族奏咸池舞應鍾歌靈鼉鼓
函鐘為宮兮太族為角姑洗為徵兮南呂為羽管嶰谷
之孤竹瑟雲和於湘浦亶聲金而振玉載鼓枻而夏啟
八變既畢六佾載舉冠華秉翟紆給容與若俯若仰若

來若往飄霓裳於雲衢若翔若行若竦若傾舉仙佩於
洛渚爰赴度而應聲宛陽阿而激楚其間大官進熟內
令奠幣侍中承盟黃門獻悅常卿奉玉步以周旋太祝
持版祝而揚厲有來雍雍無然泄泄列耀秀華凝芳郁
荔雲飄飄以飾山壘蘭芬芳而浮沈劑川澤滌滌以鴻
濛丘陵焱悠而容裔一人對越允穆穆以皇皇有辟駿
奔猗踰踰而濟濟洞淵微以神交殫精誠以血祭亶明
德之惟馨宜神祇之篤惠福飲兮秬鬯芬馥昨受兮籩

壘寇率肅肅之儀既盡穆穆之禮既行乃返旆於黑時
遂迴輪乎紫宮叱豐隆使扶輶呼蒙公以當兵車雷震
而風厲馬鹿超而龍騰天曠朗兮無塵鸞和鳴兮有聲
絲管啁啾以嘲哢鐘鼓啣嗑以呼宏迓至和於五位迎
純嘏於九重羣望既秩裡禮告成於是禮官奉策而進
曰國家大事在祀萬物資生在土惟泰元與媪神比慈
母與嚴父兩儀既分而異位二禮焉合而並舉觀周禮
司樂之遺制知兩間秩祀之各所汾陰澤中曾起議以

專祀元始漢武胡鍾訛而共簠邈曠典於千年蓋特祀之可數太和魏文建德周武先天唐宗開皇隋祖并宋帝之元豐僅歷世而五主彼其二年一祀固苟簡而非經而此之隨得隨失亦未為百世之懿舉也我皇握符闡珍鋪芬衍鑠修百王之廢墜恢往聖之述作辨時位順陰陽倣形色別圓方實柴樵燎隆突兀而騰越沈狸鬴辜從沈淪以潛藏元祀既稱嘉謨允彰將植華平於春圃豐朱草於中唐諸福之物可致之祥紛綸乎表大

地之福釐霽霽乎昭蒸民之阜康也於都乎休哉天子
穆然而思道然而喜曰唯唯否否吾聞事神以實不以
文起禮以義不以制議事以時尚其通敦典以禮審其
勢我高皇初肇祀於鍾山洪應衍休後合祀於太祀嘉
禎滋至逮列聖守虞書之肆類固錫羨而隕祉乃世廟
從周禮之兩郊亦永年而長世苟明信之能至奚擇乎
澗溪沼沚之毛苟禮義之不愆何惜乎壇壝經營之費
時詘兮慮儀衛錫予之繁難禮繁兮懼乘輿頻出之非

計予將籌大盈之充虛晞元黎之培植省績藻之繁文
謹明祀之誠意豈止奉遺典而遵修纂前文之陸離已
哉於是羣臣稽首載拜揚言曰旨哉言乎是蓋景鑠之
上儀鴻遠之懿志也爰系之以詩曰從從神州曠無垠
兮求神式廓渺崑崙兮黃王白禪樸無文兮神之格思
方澤濱兮聖皇於穆覃真純兮潏洵滲漉浸以深兮感
招靈眈福釐新兮萬有千歲子孫振兮

迎長日賦

以三王郊禮日用夏正為韻

唐

柳宗元

惟饗帝於事天必推策而迎日寅方肇建候啟蟄以展
儀卯位將初爰用牲而協吉送烈烈之凝氣導遲遲之
陽律猶分可愛之輝式停寅賓之質稽之虞典期匪疾
而匪徐行以夏時契惟精而惟一職在馮相事傳小正
符上春以備儀必修其始先仲春而有事故謂之迎時
也淑景初延幽陽潛啟當四時之首位用三代之達禮
探賾索隱得郊祀之元辰極往知來正邦家之大體事
冠前古儀標後王皮弁乍臨土圭之影猶積泰壇既罷

玉漏之聲漸長變熙熙之純曜流杲杲之晴光璧彩始
融麗景欲凝於城闕輪形尚疾斜暉未駐乎康莊是知
迎長日之儀寶玉心之所共兆南郊之正位乘陽事之
所用故可以知上下之分際見天人之交動浮晨光於
俎豆散微照於苞茅周流金石暉照陶匏異乎天紀不
修秦伯尚矜於泰畤日官失職晉侯徒繼乎夏郊於以
迎之則無違者委照將久豈三舍之足憑延光可期胡
載中之云假自然應以繁祉錫之純嘏禮儀允洽於神

人正朔克周於戎夏今我后再新古禮與天地相參應
戩穀之宜受之千億奉郊祀之報至於再三然則迎長
日恭祀事並虞夏而何慙

迎長日賦

以三王郊禮日用夏正為韻

唐

李程

氣之至今景之長郊之初兮國之陽將有事於新日以
無忘乎舊章太史先期而以告天子齋心而有常且曰
經紀不忒乃貞明而成象疾徐中度胡躔次而可量俟
一人天臨而斯出俾羣后景從而有光可以冠千古之

嘉禮軼三代之盛王然後五輅乃駕六龍是驂迎炎精
表著明於君象就陽位乃展禮於國南斯可以人詠明
哉且知配虞帝之二工升歌也奚獨美文王之三且天
有兩曜今日無其匹域有四大今王居其一將報本而
郊天因宣明而主日大司徒執圭以表位羣有司奉璋
而有秩義和御之而有倫疇人則之而無失運行之次
望遲遲以就陽寅賓之時見杲杲而已出始也戒職司
明國體卜郊之典無闕迎日之義爰啟受命於祖作龜

於禰是皆匪愆於儀未有不謹於禮禮容必呈祀事孔
明迎扶桑之初乃實柴而薦敬因吉土之兆同埽地而
貴誠信列辟之盛節俾歷代而作程魏則朝於獻歲夏
則置乎小正今則聽封人之善祝採從臣之嘉頌時令
空美於風行帝力孰知其日用人悅於下禮行於郊不
獨服尚玄素器遵陶匏是知禮之設也教之大者彼孔
稱從周殷因於夏曾未若我后敬授人時而天錫純嘏

焚柴賦

以報天享日精
意蠲潔為韻

唐何迥

於穆聖君功高德奧利澤能廣靈祇必禱溢周夏之珍
符繼三五之徽號順眀心而展禮擇良日而大報所以
后土祈穀圓丘祭天雍雍濟濟翼翼乾乾建朱干而日
曜張翠帳而雲懸皇帝嚴法駕而戾止詔羣官而萃旃
藉白茅以顓若望青壇而伋然我君精潔我后孝享容
衛翩翻威儀森爽就陽之位斯在薦帝之儀罔失陶匏
必成牲玉惟栗風伯戒道玄冥司律惟天命予之辰惟
帝告天之日靈神以之保乂昊穹以之宥密穀核洋溢

鼓鐘鏗鉤三靈同感庶物皆精故祭者修禮之義柴者
告成之意燎焜煌而上熏煙勃窳而旁駛朝野美乎聖
澤華夷贊乎能事惠浹洽於煇庖恩汪濊於民吏則知
柴而致福祭示吉蠲效周室之為理望虞家之有年福
福應兮飛焰神神來兮駕煙珪組既陳酒醴皆潔繼功
前王垂裕來哲化成而萬歲無疆禮畢而四方有截諒
夏郊之義舉媿序能之筆拙

郊特牲賦

以藟栗之微貴
乎誠懇為韻

唐

韋 充

天寶至尊物難致味所以郊祀之展禮惟重犧牲之用
犢有為故能昭德馨導生氣叶上帝精明之感必因誠
以告虔示下土恭謹之心有以小而為貴由是選才斯
始稟命有歸固資於至敬之薦不在乎充身之肥盡黑
黃蒼赤之形舉書其數用齒角皮毛之狀具體而微苟
山川之不舍曷天地以相違當其大禮既陳泰壇斯踐
形殊歸獸角若獨繭羈縻忽至初無悚於肇牽穀鬴方
來終有悲於餘喘肅然之內蠹爾如生委質未分於天

理亡軀終徇於物情足以上祇明命下達精誠乾乾之意不虧因必之於心敬戢戢之儀斯異亦何假於楅衡可以薦明時可以撰吉日天子以之合禮而具備有司用此陳儀而罔失殺身之際雖有補於馨香登俎之時固無慙於榛栗斯可以見至德在斯入用惟時實禮之大者在信以成之介葛雖聞於早辨莊周誠得而興悲是故聖人制禮作樂必資後學分隆殺於輕重之心辨等儀於長短之角彼賓客者滿尺宗廟者盈握曾何足

以表於齋莊固未可以彰其忠懃方今四海既定小信
咸孚郊天祀地之禮將展博碩肥腍之用奚無所以下
臣稽首而歌曰惟吾君之德也與天地之魏乎

雍時舉燿火賦

以享神之期候
此為節為韻

唐王起

雄雄雍時兮神州之壤赫赫燿火兮橋衡之象所以郊
祀克明所以照臨是仰成形中度知有要而有倫燭幽
以時表來顧而來享肇秦帝而有制洎漢皇而不爽伊
昔克修羣祀大合百神聲明雲集文物星陳仰珠旒則

嚴其待曙聽玉漏則闇然未晨晦威儀之秩秩迷俎豆

之莘莘張華燈而其光不遠秉神燭而其明不均則雍
時之舉燿火也莫之與倫既而亭亭有揭皛皛方蕪於
以觀百里之備於以昭五夜之節拂瑞雲之表乍疑乎
燭龍方來入靈壇之中又似乎神光不絕由是皚皚炳
映盞斚鑄彝咸若光而若滅罔顛之而倒之熠爚無替
熒煌自持在質明而有讓當委照而無私殊太叔之於
田盤遊是舉異齊侯之設燎朝會為期薦嘉者於焉仰

止執熱者難乎嚮邇電延而自西自東星繁而一彼一
此比王屋之火空際不流似陳寶之光祠中乍委則雍
時之義斯焉取斯燿火之作為於有為照苾苾與芬芬
自明無黷燭蹒蹒與濟濟方表有儀故將崇其明祀立
我洪規豈徒散孤光於地表煽丹燄於天垂而已哉國
家祀典式崇舊章必授思宅中而圖大雍時方弘法居
上而克明燿火斯候足以掩前王之純懿諒介福而何
究

1941


Part 1:

御定歷代賦彙卷四十八

謹案第十六頁後一行威鳳翩聯于雲旂刊本鳳
訛風今改

第三十七頁後六行秦伯尚矜于秦時刊本秦訛
泰據文苑英華改





總校官庶吉士臣張能照
校對官編修臣周厚輅
謄錄監生臣李維翰